

摘藻堂四庫全書薈要

集部

欽定四庫全書薈要

集部

御定歷代賦彙卷三十五

欽定四庫全書薈要卷一萬七千二百五十四

集部

御定歷代賦彙卷三十五

都邑

鎬京賦

元 楊維禎

鎬京賦

都賓問於北都主人曰昔宗周之經邑也眷我西

土實惟作京烝哉武王適觀厥成主人亦嘗聞其說乎

主人曰未也願賓攄懷土之素發思古之幽博我以王
道弘我以宗周賓曰唯唯夫姬德之興也始於后稷封

自邵土長於公劉克篤前祐去邵即幽躬服勞苦太王
肇迹艱難岐下國人懷歸從之如雨文王述業有此武
功既伐於崇遂邑於豐武集大統奄有四方遷都卜宅
於昔有光肇造區夏世有哲王受此丕基王配于京大
哉王之受命而都之也俯協白麟之符仰寤赤烏之禎
承以天命之眷正以寶龜之靈越豐水之東而宅是
鎬京實以繼十六王而始居開八百年之太平考其
地勢為古雍州為今京兆函嶠二華之踞其左褒斜

二念萬物之失生觀魚藻之興刺將不樂乎鎬京日
璧色以自縱乃遂焉而逢殃吾已知宗周之不競而
轍一東於王城矣賓之言未已而主人喟然嘆息曰
客誠好古之流歟惜乎信耳而遺目也子能知古昔
之西京而未知今日之北京也皇矣上帝求民之莫
大哉至哉乾坤元德作我父母天開地闢乃眷北顧
此維與宅蓋自帝堯啓都召公拓迹慕容不能稱此
土完顏不能據茲域惟聖人之應符環衆星而拱極

隴坻之界其右終南太乙之表其前洪河涇渭之帶
其後天邑亢爽惟神皋之所託上腴廣衍乃奧區之
所受於是辨方位建國鄙經歷九軌城隅九雉左祖
右社面朝後市翼翼巍巍四方所視若其五十封族
八百分邦壯我屏翰守我井疆維城磐石根深本強
使天下輪運而輻輳宜其縣世徙於久長想夫蹒蹒
之僚駕趨遙羽肅肅之后駿奔踵武執珪執纁貢球
貢紵九夷之表八蠻之主賁贄聯絡膜拜偃僂稽矢

來於肅慎獒獸獻於西旅紛重舌而九譯僉來王
而順序於時開明堂臨辟雍旒冕密勿衣冠會同
盛禮興樂於論鼓鐘庭實千品旨酒萬鍾舞掉八
佾歌洋九功漏澤霈甘雨仁聲逐祥風此鎬京之盛
槩而非曩日岐豐之可以比隆矣迨夫成王五遷卜
惟洛食土中是據土圭攸測風雨交會貢賦均適協
周召之經營朝萬方之玉帛遷殷頑兮是處務密邇
乎王室何艷鄙之復還固未忘于故邑慨歷世之十

累列聖之洪基貽萬葉之燕翼若其前滹沱後居庸
雪山峙其西太行屹其東拊上谷為脊脊控中夏為
腹胸曾不恃乎巖險與襟帶未足擬諸其形容蓋其
光宅四表仁深草木厯開八百狹周基之興龍形得
百二悼秦關之失鹿八方士女同后妃節儉之風萬
里衣裳比公子仁厚之族故城郭之大在無外之寰
宇宮室之美在可封之比屋使漢京之賦賦之而未
盡雖周鑄之歌歌之而不足賓幸生乎元世夫何信

耳而遺目賓乃憊墨不言慄然下意逡巡避席謝罪而退

大都賦

有序

元
黃文仲

竊惟大元之盛兩漢萬不及也然班固作二都賦天下後世誇耀不朽今宇宙昇平宜播厥頌文仲幸生聖世獲覩大都雖不克效其聳牙之文繁豔之語亦不願聞其奢靡之政浮誇之言謹摭其事撰大都賦上於翰林國史謹以備采擇之萬一其賦曰

有客以風雲為氣江海為量一蹈萬里顧盼伊壯嘗掉
鞅金陵鼓枻錢塘浮汴入洛西遊咸陽臨殘城之餘景
黯煙草其悲涼悲哉敗國之迹何必於此乎彷徨方今
天廓一字地合八埏皇居帝闕新宅於燕萬方臣妾罔
不後先猶北辰之朝列宿東海之會百川今也不往白
首何年道齊魯以前邁歷趙魏而北轅亦既至止於觀
都內非雷而喧非電而奔懍兮怳兮殆失所存大都主
人目而招之曰子豈出蛙坎而望滄渤脫蟻封而覩瑤

崑者邪何神志不定四顧市人若將襲而問之也客曰
唯唯予行天下多矣獨此大都足不及履城闕之雄風
物之異幸子告我毋以為鄙竊聞燕之為壤古曰幽州
召公拓其規昭王闡其猷慕容據之以爭中夏完顏臨
之以朝諸侯名蹤勝跡萬歲千秋子能舉之否乎主人
撫掌而笑曰固哉客之問也彼小國一君偏方一主朝
盛夕衰何足以語維昔之燕城南廢郭維今之燕天下
大都宇宙千齡而啓運帝王一出而應符山川改觀民

物易居開天拓地自作制度豈轍人之軌而躡人之跼
我太祖皇帝之龍興也乘乾位王水德耀玄武撫璿極
鐵騎長驅金燼奄熄控扼南邦於焉駐蹕列聖相承有
事疆場顧宮室其未遑日飭厲乎兵革世祖皇帝神聖
武文既傳國以建號復紀元而書春操轡策而馭羣雄
臨水火而救兆民授閭閻鉞者如靖如勳運廟謨者如張
如陳有角皆崩無擾弗馴雨露所被知其澤風霆所至
知其神是宅是圖以取以守恢皇基於億載隆畿制於

九有因滄海以為池即瓊島而為園近則東有潞河之
饒西有香山之阜南有柳林之區北有居庸之口遠則
易河滹水帶其前龍門孤嶺屏其後混同鴨綠浮其左
五臺常山阻其右所謂子孫萬世帝王之業與海岳相
為長久者也乃樹厥墉乃鳩厥功畫萬址以效地連萬
雉而橫空高謂山兮何平長謂堤兮何崇闢門十一四
達憧憧蓋體之而立象允合乎五六天地之中前則五
門駢啓雙闕對聳靈獸翔題而若飛怒猊負柱而欲動

東華西華翼其傍左掖右掖夾而拱開厚載以北巡迤
邐乎行在之供奉內則宮殿突兀樓閣扶擁如峯之攢
如濤之涌瓦與天一色而瑠璃滑壁與霞爭光而臙脂
重宮宮堯堯縹縹緲緲金楠雕楹華桺彤棹揭崇天之
扁於雲端卓鎮雷之竿於漢表奮角張牙衡脊鼓翼浮
動於蒼松翠檜之杪後則奇峰怪石巒巒屹屹異葩珍
葩檀檀藥藥紅者珊瑚青者琅玕亦肪其白亦錦其斑
中有虎豹犀象熊豕鹿獐鷹鷂鷗鶻猛足健翰莫不承

恩被澤飛走乎其間又有西天比丘傳戒伏魔手繡金字頭茸赭毛輦內舁酒鳴鼓吹螺居之圓殿為國護持出入清禁莫之誰何上有廣寒奠於嵯峨聽政之暇憂民之勞御步輦以臨幸垂天目於秋毫下引西山之淪漪蟠御溝而溶滴經白玉之虹橋出宮牆而南逝以佃以漁以舟以楫普為萬民之利聖人之心可謂至矣且以一統之大四海之富非不能窮美而極麗固將昭恭儉之先謀垂法則於後世也於是東立太廟昭孝敬焉

西建儲宮衍鴻慶焉中書帝前六官稟焉樞府帝傍六
師聽焉百僚分職一臺正焉國學崇化四方景焉王邸
侯第藩以屏焉神州赤縣首承令焉彬彬乎簪笏之林
古無此盛矣迺闢東渠登我漕運鑿潞河之垠塲注天
海之清潤延六十里瀦以九堰自汴以北者輓河而輸
自淮以南者帆海而進國不知匱民不知困遂使天下
之旅重可輕而遠可近揚波之櫓多於東溟之魚馳風
之檣繁於南山之筍一水既道萬貨如糞是惟聖澤之

一端已涵泳而無盡論其市廛則通衢交錯列巷紛紜
大可以並百蹄小可以方八輪街東之望街西髣而見
髣而聞城南之走城北出而晨歸而昏華區錦市聚四
海之珍異歌棚舞榭選九州之穠芬招提擬乎宸居廛
肆至於宮門酤戶何熒熒哉扁斗大之金字富民何振
振哉服龍蟠之繡文奴隸雜處而無辨王侯並驅而不
分屠千首以終朝釀萬石而一旬復有降蛇搏虎之技
援禽藏焉之戲驅鬼役神之術談天論地之藝皆能以

蠱人之心而蕩人之魂是故猛火烈山風之轟也怒風
搏潮市之聲也長雲偃道馬之塵也殷雷動地鼓之鳴
也繁庶之極莫得而名也若乃城闔之外則文明為舳
艫之津麗正為衣冠之海順城為南商之藪平則為西
賈之派天生地產鬼寶神愛人造物化山竒海怪不求
而自至不集而自萃是以吾都之人室無白丁菴無浪
輩累贏於毫毛運意於蓰倍一日之間一闕之內重轂
數百交湊闐闐初不計乎人之肩與驢之背雖川流雲

合無鞅而來而隨消隨散杳不知其所在至其貨殖之家如王如孔張筵列宴招親會朋誇耀都人而幾千萬貫者其視鐘鼎豈不若土芥也哉若夫歌館吹臺侯園相苑長袖輕裾危絃急管結春柳以牽愁佇秋月而流盼臨翠池而暑消褰繡幌而雲暖一笑金千一食錢萬此則他方巨賈遠土謁宦樂以消憂流而忘返吾都人往往面諛而背訕之也言其郊原則春晚冰融雨霽土沃平平縣縣天接四目萬犁散漫兮鴉點點千村錯落

兮蜂簇簇龍見而凍根載茁火出而早蕤漸熟柳暗而
始蒔瓜棗花而猶播穀栽草數畝可易一夫之粟治蔬
千畦可當萬戶之祿寒露既零雄風亦多率婦子以刈
鉅憂氣候之蹉跎來輒去穀如亂蟻之潰殘垤千困萬
庾若急雨之漚長河爰滌我場其樂孔多有門外之黃
雞玄隼與沙際之綠鳬白鶩收霜菜以為菹釀雪米以
為醢社長不見呼縣官不見科喜豐年之無價感聖化
而謳歌嗟夫飢者帝食之寒者帝衣之居者帝安之亂

者帝治之中統之深恩至元之厚惠民之思之庸有既
乎矧我皇上纘二世之鴻烈紹六世之宏基明侔乎兩
曜令信乎四時惠顧下土載謀載惟謂一農不遂其耕
則四民或受其飢傷我畜者虎狼害我苗者鹿麋每歲
孟春親御六飛南臨漫衍大獵乎滹水之湄萬騎分馳
霆奮颯發弦鳴禽落網動獸蹶百鷲舉層雲裂羣獫奔
歲草絕飛者委毛走者僵血虞衡奏功天子乃悅匪耽
意於遊畋將講武以蒐閱畢獻禽而行賞迴翠華而北

轍遂幸上都避暑於朔慮牧畜之妨農逐水草於廣漠
雲嫺以南既芟既穫徐擁輿衛毋俾民虐千官領至羣
樂大作天子之心為民而樂彌畿甸之千里悉扈駕之
部落維牛維羊維馬維駱貧民以百計富者以千約民
之五雞二豕何遼邈哉由是慶區宇之昇平彰穹昊之
明貺嚴聖心之翼翼爰潔備乎祀饗道流間南北之音
釋子雜蕃漢之狀步虛而款鸞鶴演樂而供獅象穆穆
在前赫赫在上非沉非甲而在乎明德之馨香於戲列

祖造之聖主保之賢臣佐之兆民好之上帝無私善必
報之故詩以太平為萬年書以皇極為五福天人相與
之際殊無奇術異道也猗歟盛哉大都之事何可勝紀
吾綱提而領挈之使爾啓聾而聽刮盲而視嘗鄙夫二
都之賦蟲魚草木何太瑣細吾若效之將與子談三月
而不止客曰然醯人誇釀酒人誇釀毋怪乎當時之士
好鼓舌而搖脣古我帝王自冀至洛惟以都名漢唐東
西因以方名吳蜀魏汴咸以地名今名以大誇孰甚焉

主人變乎色曰爾言過矣豈謂鴻之翮而猶鵬之翮蜥
之鱗亦猶龍之鱗邪大之為義無匹無倫非我皇上之
德疇克當之汝復坐而聽我所云帝不爭土王始制地
始焉萬國終焉七氏畿封之內會盟戰誓自君自長何
有於天子厥後能統一者秦漢晉隋唐而已西至乎玉
關東至於遼水北至於幽陵南至於交趾得縱者失橫
有此者無彼大哉天朝萬古一時淥江成血唐不能師
今我吏之遼陽高麗銀城如鐵宋不能窺今我臣之回

鵲河西漢立銅柱馬無南蹄今我置府交占雲黎秦築
長城土止北陲今我故境陰山仇池馭舌螺髮髻面雕
題獻葵效馬貢象進犀絡繹乎國門之道不出戶而八
蠻九夷謂之大都不亦宜乎客曰博哉子之所言上周
乎乾下括乎坤故能獨高萬古而號曰大元於是主人
曰未也爾知其大未知其所以大是猶遠望巨峰而不
見其址近覩長江而不見其源吳起不以西河為美而
德其美婁敬不以洛陽為安而德是安况巍巍蕩蕩之

境必有強其本而壯其根者也且夫陳主歸隋周王入秦山陽祖送萬古悲辛惟我國家待降以賓藐江南之趙孤能納土而稱臣既寵之以封爵復全之以終身彼南巢之放猶有慙於古人孰大乎吾天子之仁元封殫力西南之墟貞觀暴骨東南之土一人逞欲萬姓何苦惟我國家止戈為武謂荒裔之民得之不利於用謂贅疣之地取之不益於富罷橫海之戈船但遣使而存撫彼有苗之誓猶且蹂於師旅孰大乎吾天子之恕羽林

象天之儀衛梨園傳月之音樂帝皆是却不警不蹕從
百僚之控鶴何其然也舜德之大臨下簡也江都錦繡
亦可赧也織坊爛霞之金繡局委雲之茸帝不是用以
彰美吾聖躬何其然也周德之大在位儉也商臺玉衣
亦可念也惟我聖皇五輅不乘八鸞不駕雨則獨乘象
輿霽則祇御龍馬何其然也念我烈祖鐵衣雨汗弗敢
安也神禹之大胼胝四載思艱難也惟我聖皇奉坤母
建隆福正事御構五華宮不為廣殿不為奢何其然也

念我先皇居數十年弗敢改也唐堯之大土階三尺防
驕泰也若乃國之大寶惟忠惟亮聖皇思之是崇是尚
可官也不以勲門不以世賞可擢也或賈或術或伶或
匠開東閣者載搜載訪寧不起膠鬲於魚鹽拔百里於
廝養國之大鑑惟夫惟祖聖皇奉之是惕是懼瞻彗象
則宥刑聞水旱則蠲賦百官貢香如帝親舉祇見宗廟
俎豆鐘鼓彌天浮屠浩不可數普閱法藏幣帛金楮變
陰陽者載佐載助寧不覩景星而瞻慶雲酌醴泉而飲

甘露國之大柄惟賞惟刑聖皇操之是重是輕或錫之
黃白予之土田而賜之服乘非必大功也以一技一善
亦人之所能或釋之桎梏免之斧鑕而周之金繒非必
大惡也以一形一氣亦人之所生掌邦典者持權而視
衡寧不陋敝袴之韓侯隘不赦之孔明國之大本惟民
惟社聖皇憂之靡夙靡夜勞矣哉遣問疾苦困矣哉詔
卹矜寡庶獄繁哉宥之以洗寃貪夫毒哉戮之以懲下
居郡國者承流而宣化寧不歌康衢之謠播行葦之雅

至若親親也則諸王鞏磐石之宗分邊戍總兵戎老老也則大臣忘祖帳之送奉朝請食鼎鐘柔遠也至簡至易亶明亶聰大綱既舉大化亦洪將胥慕於稷契孰肯附於鯀共丕顯哉聖皇之德日盛日隆前乎百世不得軌其步後乎百世不得踵其蹤惟其有大德之大故能成大元之功惟其有大元之大故能成大都之雄客曰問一得三云胡不喜惟茲三代孰得而比主人曰詩不云乎維其有之是以似之夫元者天地之苞也德者天

地之美也都者天地之會也微天地之大孰能與於此
哉客起而歌曰天其玄兮地其黃兮維此大都統萬方
兮天其生兮地其遂兮維此大德囿萬類兮天其高兮
地其厚兮維此大元齊萬壽兮恭望闕廷頓拜舞蹈而
退

皇都大一統賦

有序

明 金幼孜

洪惟天朝太祖高皇帝誕膺景命龍飛淮甸既渡大江
遂都金陵撫有區夏肇造洪基以開萬世太平之業逮

我皇上繼承大統克紹丕圖仁恩誕敷聲教洋溢雨暘
應期民物阜蕃薄海內外罔不率從而自蒞祚以來宵
旰拳拳惟思所以繼志述事以承太祖高皇帝之意於
是倣古制肇建兩京以為北京實當天下之中陰陽所
和寒暑弗爽四方貢賦道里適均且沃壤千里水有九
河滄溟之雄山有太行居庸之固玉泉之流經緯乎禁
籞之中碣石之壯盤踞乎畿甸之內故其山川之壯觀
風氣之清淑真有以卓冠四方為萬國之都會誠帝皇

子孫萬萬世太平悠久之基由是敕冬官洎内外文武百執事經營於茲而凡民庶士卒工匠之流莫不駿奔子來趨事赴工罔敢或後遂至天意人心感孚和同靈應疊臻嘉祥屢薦不數年間厥功告成而宮闕府庫之宏壯郊廟社稷之嚴肅朝市民物之鉅麗秩乎其有序井乎其具列盖自古先帝王都邑之盛未有逾於此者乃永樂辛丑春正月朔旦皇上御奉天殿大朝海内文武羣臣四方蠻夷酋長率皆在庭踴躍鼓舞以為皇都

之奇麗若此誠曠古所未見而未有者而所以為皇上
萬壽之徵宗社磐石之固聖子神孫寶祚綿延之慶皆
兆於此矣何其盛哉臣幼居禁苑職業文詞幸際昌期
躬覩盛美謹鋪張為賦以彰太平之偉烈且以昭示於
無窮其辭曰

維太祖之受命膺上天之禎符奮布衣於淮右提一劍
而長驅乃翦夷於羣醜悉蕩滌於寰區既渡大江金陵
是都虎踞龍蟠興王之居爰啓鴻業肇開皇圖振光華

於曠古恢萬世於弘模繫我聖皇祇膺寶歷奉天勤民
太祖是式恩覃九圍仁周八極雨暘應期民物豐植觀
四方之清寧乃有念於京邑維此北京太祖所屬天造
地設靈鍾秀毓總交會於陰陽盡灌輸於海陸南臨鉅
野東瞰滄溟西有太行之巖嶺北有居庸之崢嶸瀉玉
泉之逶迤貫金河而迴縈瓊島上聳以盤礴太液下澈
而泓澄將繼志而述事必於此而經營乃敕羣工乃命
百職萬方子來效勤殫力萃四海之良材伐南山之鉅

石感恩意之昭乎戒經營而弗亟於是天心協順靈應
彌彰布輪囷之卿雲發璀璨之祥光醴泉湧其浩浩甘
露下其瀼瀼赫萬靈之呵護藹瑞氣於穹蒼乃卜良辰
乃蠲吉日以相以度以構宮室棟宇崇崇簷楹秩秩以
蓋以覆陶冶埏埴以繪以圖黝堊丹漆煥五采之輝煌
作九重之嚴密天地洞開馳道相連金鋪絢日玉柱凌
煙星羅棊列壁燦珠聯虹飛霞擁龍翔鳳騫超凌氛埃
壯觀宇宙規模恢廓次第畢就奉天屹乎其前謹身儼

乎其後惟華蓋之在中竦摩空之偉構文華翼其在左
武英峙其在右乾清並耀於坤寧大善齊輝於仁壽豁
千門之雲矗敞萬戶之輻輳至若丹闕巍巍飛觀凌空
觚稜上聳閣道遙通左祖右社蔚乎宮窿有壇有墻有
寢有宮亦有天地以嚴其崇復有石渠天祿以蓄圖書
玲瓏綺錢照耀文疏懸牙籤之萬軸列紺帙之紛如宛
奎壁之宵映燦藜燈之夜噓瀛洲文學之士閭苑列仙
之儒備顧問於朝夕咸欽仰於聖謨又若大庖光祿列

乎西東珍羞駢羅玉食惟豐禁城之下金水溶溶畫棟
凌雲繡柱含空璇題耀日綵橋駕虹雕甍隱映寶殿玲
瓏太孫所居諸王之宮金枝玉葉照耀層空育德講學
宴適遊從若夫御苑逶迤上林深窈有山有泉為臺為
沼巖谷谿谷雲霞縈繞走有奇獸飛有靈鳥樂寬間以
棲息恣回翔以馴擾復有天閑十二駿骨軒昂渥洼神
龍之種大宛名駒之良並權奇而雄傑或磊落而騰驤
又若廩庾輪囷惟萬惟億豐歲所儲累世之積玉粒金

稭露積充溢國用所資人足家給復有武庫巍峩戈矛
森列旗幟搖雲鎧甲耀雪凜凜白旄差差黃鉞四征不
庭以彰九伐奮軍聲之揚揚振皇威之赫赫又若內帑
充牣寶藏紆餘奇珍異產海匯河輸夜光之璧明月之
珠琉璃翡翠瑪瑙珊瑚車渠琥珀火齊璫璣錦繡迺遷
羅綺芬敷又若百司庶府有綱有目文武頡頏為國鈞
軸太學郡庠之並建琳宮梵宇之森矗列九衢之坦坦
引六街而相續閭閻櫛比闐闐雲簇鱗鱗其瓦盤盤其

屋馬馳聯轡車行擊轂紛紜並驅雜遝相逐富商巨賈
道路相屬有貨填委丘積山蓄又若歌樓舞榭豔態穠
妝羅袖迴雪清聲繞梁管絃嘔啞狎坐傳觴娛青陽之
麗景駐白日之飛光雖小大之不遺仰制度之畢備斯
皆聖智之籌謀實出宸衷之經緯儼氣象之一新壯規
模於萬世屹鴻基之豐隆偉山河之巨麗貽子孫以嘉
猷紹先皇之初志邁豐鎬之舊規軼漢唐之遺制於是
厥功告成慶叶天人乃歲辛丑維孟之春王正之月朔

旦良辰聖皇臨幸大朝羣臣内外文武濟濟彬彬戎狄
蠻貊工商士民稽首嵩呼抃舞歡欣筐篚具列方物畢
陳以饗以醑洽此皇仁大一統而無外謁至和於八垠
臣忝詞垣叨職文字懷眷寵之彌深愧涓埃之無補際
千載之良逢幸微生之快覩傳盛事於將來奚往牒之
足數祝萬壽於萬年播皇猷於千古

皇都大一統賦

明 楊 榮

維皇明之有天下也於赫太祖受命而興龍飛淮甸風

雲依乘恢拓四方弗遑經營既渡江左乃都金陵金陵
之都王氣所鍾石城虎踞之險鍾山龍盟之雄偉長江
之天塹勢百折而流東炳後湖之環繞湛寶鏡之涵空
狀江南之佳麗匯萬國之朝宗此其大略也迨於聖皇
嗣大一統剛健日新聰明天縱囿四海以為家登羣賢
而致用思繼志之所先惟都邑之為重於是天意鑒觀
人心和同神靈效順龜筮協從既應天以順時爰辨方
而正位視往聖而獨超繼高皇之先志乃相乃度載經

載營眷茲北京山川炳靈其為形勢也西接太行東臨
碣石鉅野亘其南居庸控其北勢拔地以崢嶸氣摩空
而崩方復有玉泉漫流宛若垂虹金河澄波雪練涵空
膏渟黛蓄浩渺冲融包絡經緯混混無窮貫天河而為
一與瀛海其相通爾其派連析津源分潞水既環抱以
縈迴亦瀰茫而清泚來職貢於四方通檣帆於萬里至
若王畿之內輦轂之間沃野彌望原陸寬閒煙火相接
雞犬相聞宵無警柝外戶不闔以牧則蕃以種則穫以

佃以漁以耕以鑿隨其所營皆得其樂而其為都也四方道里之適均萬國朝覲之所同梯航玉帛為都邑之會陰陽風雨當天地之中爰敕臣庶爰伐材木南浮湖湘西入巴蜀斧披虹霓聲撼山谷徂徠之儲新甫之蓄榱桷杞梓杉楮檉楠梢橫青天根連地軸鉅細畢輸長短悉錄駕雲車之百輛振龍驤之萬斛紛紜輻輳彌布川陸厥材之良不一而足若乃美石比玉從古所稱瑩者如圭潔者如瓊溫者若璐潤者若瑛以磨以礪乃堅

乃貞鏗林振壑馳飆驚霆千夫所攻萬里啓行山靈助
其光華坤后發其精英豈砥砢之敢混實寶玉之爭呈
若夫坎離播功坤艮合德出於陶冶成於埏埴飛紫燄
於半空結祥煙於八極或規以圓或矩以方燦琉璃之
一色耀文采於中央或肖形於獸吻或擬質於鴛鴦於
是良時載啓吉旦既卜臣庶駿奔溺若雲矗源源其來
登登其築百堵皆興萬夫相属行若魚貫立若鱗蹙斧
斤揮霍尺度攢簇由是賁育效力公輸獻奇曰爰曰斯

伯與暨垂攄厥巧思運厥神機各效其能以見於為顧
小善之並錄矧妙伎之或遺羣材礨磊以山積鉅棟騰
躍而翬飛爾乃九門洞開三殿攸建觚稜雲聳丹漆霞
絢輦路逶迤閣道迴轉華盖屹立乎中央奉天端拱乎
南面其北則有坤寧之域乾清之宮璇題耀日寶柱凌
空金鋪璀璨綺疏玲瓏珠玉炫爛錦繡丰茸歲蕤起鳳
天矯盤龍千門瑞靄萬戶春融其南則有午門端門左
掖右掖丹闕峙而上聳黃道正而下直豁大明之高張

屹正陽之拱揖繚周廬之穹崇蔽重甍之護翼其左則
有宗廟之祀以奉祖考仰在天之神靈隆萬古之尊號
謹歲時之烝嘗薦純誠於蘋藻其右則有社稷之靈以
崇祀享汎壇壝之肅清通神祇於肸鬯爰春祈而秋報
用昭荅於靈貺若夫乾清之前門列先後日精月華之
對峙景運隆宗之並構謹身翼乎其前仁壽屹乎其右
又有奉先之祠大善之殿文樓武樓之特聳左順右順
之並建若乃震位毓德文華穹窿亦有武英實為齋宮

有天財寶藏以貯珍貨有大烹光祿以典殮饗寶善在
左翼翼思善居右而崇崇若夫欽安之後珠宮貝闕
藻繡交耀雕櫳截竄六宮備陳七所在列親蠶有館繅
絲有室二南詠歌播於篇什輔德相承風化洋溢皇城
之外殿宇魁渠有翼有嚴太孫之居金水之濱瑤階玉
除梁棟巍巍上凌太虛為諸王宮翊衛皇圖星羅綦布
以臨九衢至若文淵之閣祕書之府纂述乎今儲蓄乎
古汗牛充棟莫知其數牙籤迤邐緗帙旁午燦奎壁之

上連赫虹霓之夜吐若夫飛閣峩峩實為承天繡楹霧
簇畫拱星聯踞石猊之盤礴聳華表之巋然至若南郊
之設特超古制圜丘方澤不岐以二合祀於中父母天
地壇分內外二十有四羣祀有典百神有位惟我太祖
實配上帝乃歲孟春三陽之始吉日斯蠲祀事有備薦
以粢盛泛以醴齊豆籩秩秩庭燎晰晰鼓鐘戒嚴鑾輿
至止儼對越以升中祝蕃禧之攸萃至若山川有壇先
農有祀馬祖旗纛各以時祭寅畏恪恭罔有弗至若夫

稽古建官為民之牧內外相承各率其屬至若黃門給
事青瑣仙班典內庭之封駁近咫尺之天顏復有文翰
之林詞藝之苑處嚴密之清禁列英華之妙選優游玉
堂之署出入金鑾之殿擅瀛洲之美譽承黼宸之清問
至若鳳池之職尚寶之司掌絲綸於紫誥典符璽於彤
闈有宗人以統天潢之派有銀臺以通喉舌之機若乃
六卿分職位躋台鼎贊廟堂之謀謨總藩方之政令至
若憲臺之任風紀是司誠耳目之所寄實法度之攸施

若夫都府有五軍政是宣奮貔貅之將士耀霜雪之戈
鉞保圖輿於安堵掃絕漠之烽煙至若都邑有庠辟雍
有學育才於茲以儲以擢若夫容臺典祀士師明刑錦
衣總夫儀衛巡警係於五城鴻臚謹朝謁之禮太僕司
監牧之名京畿布列於州郡田野參錯於屯營至若奉
神有祠報功有廟梵宇琳宮光輝朗耀倉廩之積如坻
如京露積紅粟陳陳相因鎧甲晶熒士卒精銳靡強弗
摧靡堅弗碎驂騶騏驥腰褭驕驕宛冀之駿渥洼之良

充乎內殿磊落騰驤又有福山後峙秀出雲煙實為主

星聖壽萬年層嶂疊擁奇峰相連鼓鐘有樓其高接天

勢若貫珠萬里繇延若乃朝市既成井邑斯列閭閻輻

輳闐闐有截豁九達之通衢羅萬室之如櫛富商巨賈

肩摩袂接北通朔漠南極閩越西跨流沙東涉溟渤來

百貨之縱橫雜輪蹄之填咽珠璣爛其輝燿羅綺燦其

騰沓至若青樓並峙綺榭相連妖姬窈窕豔女嬋娟穠

妝競倚粉黛爭妍引歌喉之宛轉迴舞袖之踟躕極酣

嬉於暇日窮勝賞於芳年至若太液之池萬歲之山澄
波潋灩層岫巒坼開闔蔽虧紫帶迴環竦飛樓於曖曖
敞貝闕於巖端門臨碧蘚之磴橋架玉虹之灣晴光出
乎軒檻飛翠灑乎闌干瞻廣寒之月殿撫桂樹之團團
爾其瑶草龍蔥琪樹羃歷長松之盤古柏之直修篁烟
挺老檜雲積瑰偉之姿奇異之植蓊然其陰嫣然其色
宛蓬瀛之在茲恍塵凡之遂隔至若上林衍沃靈囿逶
迤渚以碧海湛以深池百草綠縟羣卉芳菲寬閒薄乎

禁籞平廣屬乎坤維樂鱗介之游泳縱毛羽之襪褫乃
有騶虞效祥麒麟表瑞白質黑章麋身牛尾神鹿貢於
遐方白象出於南裔倏玄兔之繼呈忽天馬之沓至復
有馬哈福祿厥獸殊形駝雞之異白鳥之禎竒姿詭態
率舞縱橫隸首莫紀伯益難名至若地祇協順天心昭
格嘉祥疊臻靈貺蕃錫神木不運而自行祥氛煥發於
巨石忽靈蛇之前導現大青於沙磧瑞光煜乎半空卿
雲縵兮五色醴泉湧兮瓊漿甘露滑兮玉液靈芝產於

碧山景星見於南極禿干兔以難窮殫百喙而莫悉然
而歷觀前代迄於往古帝王所都難可畢舉豐鎬之美
崤函之固宛洛之奇汾晉之富雖或雄據於一時控馭
於中土而於今茲帝都之壯麗又豈可以同年而語哉
迺歲庚子告成厥功辛丑正旦方春和融聖皇御寓萬
方會同百辟卿士肅肅雍雍蠻夷戎狄罔不率從戴白
之叟垂髫之童且欣且忭拜舞呼嵩仰祝聖壽萬福來
崇慶此皇都佳氣鬱蔥擴基圖於萬世偉壯觀於九重

真帝王悠久之業據山河表裏之雄然而聖天子以六合為家以四溟為池以仁義為干櫓以禮樂為藩維不恃險以為固惟在德之所施至和塞乎穹壤恩澤洽乎華夷致九有以寧謐躋萬國於雍熙此其所以德侔乎堯舜道合乎軒羲窮天地亘古今而莫能與齊也臣職禁垣叨蒙眷顧謏陋是慙涓埃莫補覩皇都之巨麗壯宏規於往古潔泓穎於長辰陳盛事以為賦又從而為之歌曰翼翼皇都萬方之會兮聖德之宏實同覆載兮

聲教所暨一統無外兮又歌曰皇都翼翼民之所止兮
惟皇萬壽福祿無已兮聖子神孫寶祚萬世兮

皇都大一統賦

明 胡啓先

若有儒生小臣好古耽文遠稽虞夏商周之載籍近閱
秦漢唐宋之遺言於是歷冀亳而覽豐鎬睇咸陽而望
長安仰東西兩京之制於往昔觀南北二京之壯於今
日載閱淮濟載涉河易爰盼太行爰俯碣石顧并營以
徬徨履滄薊而跼蹐觀於都城則氣象弘廣即夫山川

則形勢雄壯其物產之利素豐饒其人民之俗尚義讓
乃上天之眷命而聖人之化成實在於斯故我朝肇建
皇都而天下一統宜在於茲邪方歎慕而未已若惴惴
而何之迺有先生長者雍容怡愉邀坐而問曰吾聞登
山者必即其崇岡涉海者必測其汪洋今子遊觀於皇
都能舉其大綱乎願聞其說生曰唯唯生雖不敏請陳
其槩夫四通是交八達所會水走舳舻陸奔輶載星拱
萬國囊括四海其宮闕則奉天華蓋謹身三殿以正位

乎外乾清坤寧兩宮以正位乎內位夫西則武英為宴
居之密位夫東則文華為繼體之大其尊卑以天地為
法象其交構與陰陽相合配駢集夫杞梓之材文彩夫
玄黃之績既觀天而穹窿極盤地而磊塊民庶咸子來
工師呈巧最實所謂華美而不奢泰者也其都城方廣
萬雉弘闢九門建樓設閣通道達闕晨鐘暮鼓更別漏
分士夫林立而商賈雲屯者也先生曰此特宮闕城郭
之美而已願更其辭於是生復請曰今之皇都古為冀

州伊洛距其前恒嶽倚其陬環西山而作城界東海以
為溝羈梁雍而絡青兗控戎貊而御吳甌導江淮以共
注引河濟而北流即金臺瓊島之可登望撫太液盧溝
之可泳游阻居庸古北以為關則遠人震懾闢趙魏齊
魯而成衢則侯甸來朝故宜帝皇之都而為萬世之良
謀此太祖之所以創業而皇上之所以闡皇猷也先生
曰此亦山川形勝之槩而已顧悉其大於是生復請曰
地土肥腴千里夷壤良木冬榮嘉禾夏長松柏檜樟梨

栗棗橡成林叢生干霄直上黍稷稻粱桑麻菽粟豐年
蔽野暢茂接屋一夫所耕十夫是足一歲所獲三歲之
蓄於焉充棟而資廟廊供粢盛而具廩祿也又有珍禽
異獸則若鷹鷄鴻鵠熊猿雉兔虎豹麋鹿麋翔郊藪馳
驅林谷隨取而獲應捕成觸於以備畋獵而具蒐狩供
宴饗而資庖肉也先生曰地利之美可以養人而非所
以成化者也於是生復請曰方今四海一家萬夫同志
典文治者咸臯夔稷契之徒任軍旅者悉呂召孫吳之

類故六卿協衷而五軍整勵加之居藩鎮者各恭厥職
處守令者咸敬乃事是以郡禮樂而邑詩書家和睦而
人孝弟農樂耕稼士懷忠義商通貨財工精技藝梯航
而來襁褓而至也先生曰子知所以化及於人者然猶
未推夫所以受命於天者也於是生復請曰陰陽調和
四序順理雨暘以時寒暑應氣慶雲見乎天醴泉出乎
地麒麟貢而鳳凰來龍馬獻而獅子至以及景星甘露
之祥芝草嘉禾之瑞白象玄兔之奇素烏鸚鵡之異自

皇上續大統基皇圖以來莫不駢臻而畢萃於以見上天眷命之隆而帝皇萬世之兆基於是也先生曰子知天命之所在然猶未究夫感化天人之大本也於是生乃再拜而復請曰維我皇上聖神文武德合天地道貫今古其繼天立極與伏羲軒轅同制度也其化成天下與唐虞堯舜合規矩也其順天應人與商湯周武協呂律也故宜建宮城以為居保山川而自固因地利之豐盛獲天人之順助為天地之君師作萬世之父母尊居

金史四庫全書
卷三十五
天位安享國土言未既先生大笑而語曰斯言盡之可
書以為皇都大一統賦

皇都賦

有序

明
董應舉

昔宋人有作汴京清明圖者寓思頗遠穆乎有豐豫之
警國家定鼎金陵成祖改卜取象北極蓋示星拱之義
兼以迫壓異類顯揚威靈有警則烽火易傳地近則號
雷易震赫哉聖謨莫於世世矣侍御某公深得此意繪
之縹素名曰積勝予反覆流覽仰聖神之無競見皇圖

之有奕撫卷吮毫不覺媿媿夫豐水貽謀商邑建福商
周諸君子之所侈揚也上林三都亦極才人之致予雖
才謝昔人而意各有為豈曰侈目飾觀曼靡蕩志云爾
其辭曰

伊昔建邦實重上游扼險百二環顧中州漢鼎西奠宋
襲東周強弱斯判圖大其謀惟我國家開天闢地始基
於南亶其北旆天啓北土乃殖乃昌收虞都之疆跡應
箕尾之靈先天則有樞皇則有宅汛六百年之氛翳奠

億萬載之丕則控沙漠之絕域憑滹河之橫駛枕居庸
標碣石左環滄海右擁太行鸞峙鳳翥翼其有京前則
涿鹿蜿蜒衍黃帝之所戰蚩尤也後則追朔倚薄名公之
所奄北國也蝕於元遼集於天邑纏日月之綺纚屹宇
宙之軒廊臨制八方揮麈六幕於是定鼎凝命正離燕
翼卜郊立社經野建極闢四墉開萬雉黃道周亘紫垣
閔恤鎖玉柱以擎天截金題之炫日嶽岑迢遞巖窠盤
躍竒端門之太極耦乾坤之清寧文華武英論道承明

亦有離宮別寢間館崇臺環列星布棊置叢排顯靈祈
祥奉先思孝皇極秉躬東宮啓後長樂鐘聲昭陽樹色
椒房掖庭璇廬祕室亦有芳林茂苑少海蓬萊移天河
於太液儼星渚之滌洄隱栖龍之綽約矯射鴻之崔嵬
流覽目窮圖畫心類外則百司庶府萬井千廛朱甍夾
道甲第雲聯列肆霧幟蹂轂摩肩沓沓璘璘橫貫層駟
則有游士飄纓任俠說劒擊筑快心市駿流羨月滿青
樓仙游奇甸角刺僧廬浮屠隱見五方輳集萬貨波薦

炫目薰心貞夫志變亦有殊方重譯通道造庭東則朝
鮮句麗南則牂牁夜郎西則無戈月氏北則寧鞮烏桓
各以方物來享來王則有歲星之獸疏勒之獅駟虞繡
虎玄豹號犀觸邪獬廌獬廌駟駟翠鸞孔雀丹鳥奇毛
又有霍山之玉大宛之珠魚腹之璜驪頷之寶鼈文珊
瑚木難火齊寶布象簞錯落照耀斯慎德之所招實綏
柔之明效也若乃重關屹嶰川原衍盈亭館相屬牙葉
相乘則有候門尹子抱關侯嬴授管秉籥望氣占星奉

使出狩之軒分符弭節之車鳧羽飾翠雲霓結旂曳捰

星於落日綴明月於圓規走盧溝之危梁馳綠楊之琉璃
斥如電激疾若飈分應接不暇往來續紛或解韉而
偃息或望塵而載奔或風塵而褰或道汲而泉或負餽
而牧或饁餉而田或倚樹而嘯或荷鍤而眠見稼穡之
艱難知民食之所天至若輦金輦壁顛肩振颺黃封百
道騰鐻千箱蹶馬仆車咽路轟岡椎膏吸髓塵蹟上方
或鑿山而挑禍或航海而遺殃豈共球之所入盡貂璫

之搶攘夫世無勤而不治欲無極而不荒地無大而不
圯心無小而不昌雖累洽於列聖亦虞損於復隍嘗試
登高山望紫塞按圖記列職方居庸紫荊山海遼陽去
京師其幾許時業爰於疆場盖有永樂三犁宣德喜峰
銘功瀚海天壤無窮英北狩而來復肅城守而張皇貢
市成而甲鈍犬羊飽而敵強吾安知夫戎馬之不郊櫬
檐之不芒甘泉燧而警漢渭橋薄而迫唐於是皇帝惕
然思蹶然作奮然坐廟堂朝方岳闢四門進鞞鐸祠郊

廟御講幄警桑杜勤錢鏐飭邊防強戎索發內帑以犒
士拔英雄而圖略收出虎於檻阱還埽除於閨閣實閭
閻惠中國歌舜絃之薰風舞堯階之千篇保金甌於無
虞紹祖烈宗功於燦灼將駕三五軼百王垂萬世等乾
坤豈漢鼎唐基所可尺量而尋度也亂曰天地昏蒙日
月揭兮太行崢嶸天造設兮襟海帶河背則碣兮四百
重歸胡運竭兮建以為都皇則哲兮衆星所拱九有截
兮萬國共球辰其轍兮岌鎮玄冥驅胡孽兮殫威振靈

復芽蘖兮犬羊不常誰能絜兮庚戌憑陵城岷隍兮糾
糾干城誰為傑兮守在四夷三五軼兮郊馬不生泉冽
冽兮貔虎百萬狼煙絕兮曰慎德而修備萬世子孫金
甌永無缺兮

大明一統賦

明
莫旦

昔者宋社既屋胡元乃興政乖教弛谷穢風腥延及季
世四方不庭干戈擾攘盜賊縱橫彌勒鼓亂妖言煽驚
或托香軍為號或假前宋為名或稱白蓮或號紅巾楚

有陳而吳有張
毫有韓而蜀有珍
大豪小猾僭主假君
蛾屯蟻聚鷗張獍鳴
是猶衣垢敝而叢虱
肉腐敗而多蠅嗟哉
元元困於爭戰威重
命輕令嚴膽顫血流
漂杵屍積攢箭鬼神
夜哭彗孛晝見海溢
山崩天鳴地震蓋九
十年矣誠天地古今
之大變也於是天生
真主奮跡田里兆應
瑞雲符乘王氣虎嘯
而風龍興而雨將相
協心弔伐斯舉左黃
鉞而右白旄前兵車
而後甲士六丁五神
之呵護九宮八門之
形勢策全器良天時
地利攻

殺擊刺兮雷轟而電掣坐作進退兮山搖而海沸東征
西怨若大旱之望雲霓簞食壺漿若赤子之思慈母故
其起濠潁戰滁和拔采石定京都殪強漢殲偽吳平淞
寇降魚鳧取兩廣收八閩江南壤地盡入版圖然後肆
伐中原席捲列郡下魯擊秦攻汴克晉兵震幽燕元軍
北遁僅一戎衣不血寸刃疆域至是而混一天人以之
而協應遂乃勉徇輿情金陵定鼎尊居九重君臨萬姓
大明建號以開天洪武紀元而表正於是討雲南以除

餘孽征蕃部以拓邊境四夷來王萬方平定所以鴻圖
大業傳萬世而無疆聖德神功冠百王而莫並此聖祖
得天下之正所以成一統之盛也猗歟休哉真人曰予
嘗誦九丘考八索訂經史驗圖籍究治亂之源求興廢
之跡惟唐虞兮三代國天下兮千百各子其民兮為君
共宗天王兮述職猶萬水之朝東海衆星之拱北極熙
然太和是謂混一然禹跡雖廣而閩粵未通周服雖大
而遼廣未入厥後蒼姬訖錄亂從而出大小相吞強弱

為敵於是析為十二併為六七秦兮無道隋兮滅德兩
晉東西九廟南北三國偏安五代角立其間惟漢嘗一
統而侵於匈奴移於莽賊唐亦一統而離為列鎮改為
周國宋雖一統而銀夏盤踞遼金割裂得縱者失橫有
南者無北所以光霽之時常少而晦暝之時常多混一
之世每踈而分裂之世常密譬如月滿則虧日中則昃
是皆本乎天運蓋不由乎人力自古一統其難如此今
先生之一統其信然邪名浮於實邪真人之言未終不

虛生勃然改容曰惡是何言也先輩謂人胸中無幾箇
國子監做不得大儒又謂人不讀書萬卷不行地萬里
看不得杜詩蓋言人必足跡廣而見聞多然後可以言
遠大而超等夷也子不見夫井底之蛙乎兀兀窮年惡
知天地之大又不見燭前之蛾乎營營終夜焉知日月
之明子為此言蓋由學問不得其傳授足跡未嘗出戶
庭無怪乎出言之不謹燭理之未精吾今語子以一統
之所以為大以開子之聾盲真人曰願安承教不虛生

曰茫茫九州焚焚八極上應天文下厯禹跡大梁玄枵
兮冀青星紀鶉尾兮揚州降婁壽星兮徐兗析木姬觜
兮幽并大火實沉兮梁豫鶉首鶉火兮雍營於是四方
之所延袤道里之所紀極霜露之所霑被日月之所出
沒寸天尺地皆入版籍此天下一統之分野也分野既
明疆域乃奠順天應天兩京畿甸鳳陽承天龍飛豹變
餘則蘇松常鎮徽池廬平揚淮和廣滁徐慶寧保和真
順廣永隆名南京以東是為浙江浙分東西嘉湖及杭

金衢嚴處寧紹台溫浙南濱海是為福建福邵興漳汀
泉延建南京西南則江西境昌饒康建撫袁臨信贛吉
九江南安及瑞由江更西湖廣一方則武昌為首漢德
荆襄長黃岳廣辰永衡常承天起聖郴靖鄖陽轉而東
南則為廣東廣州為首潮肇韶雄高雷廉惠瓊居海中
廣之又西桂柳潯寧梧田樂慶恩太鎮明泗利奉向都
龍江陵廣西之西貴州雲南則銅黎思鎮石晉寧安大
雲臨景楚廣潯沅軍民有府數莫可殫貴州西北則四

川地保馬重成順夔及叙此九藩者南方也由南以北
踰淮涉洪則河懷南汝彰衛開封是河南為天地之中
京師東南海岱蒼蒼曰濟曰兗東青登萊則是山東為
鄒魯之邦山東西北大同宣府太原平陽遼汾澤潞是
山西倚於京左京之西南西嶽巍然則西臨漢鳳慶鞏
平延是陝西鄰於四川此四藩者北方也其餘州百縣
千鄉萬里億幅員之廣不可紀極此天下一統之郡縣
也高山廣水后土是載神封作鎮以為限界故麒麟獅

子兮擁鍾山於天中龍虎鳳凰兮拱天壽於雲外祝萬
歲兮太平望諸陵兮朝拜山則天台天目日觀月精玉
筍玉溜金庭金城大邳大別太白太行崑崙匡廬賀蘭
白登麻姑天姥兮虎丘鴈蕩首陽少陽兮內方西傾武
夷蒙羽兮岷嶠王屋八公三竺兮九疑四明予獨尊夫
五嶽五鎮之山兮何高大而神靈饗祀典於無窮兮出
雲雨而化生吾欲效夫尼父之登臨兮小天下於雙睛
水則五湖五溪三泖三湘七澤七渡九河九江伊洛瀍

澗兮涇渭漢沔灘沮汶泗兮沱潛衡漳大野彭澤兮雷
夏荷澤滹沱鴨綠兮巫峽滄浪弱水流沙兮滇池錢塘
黑水混同兮高郵吳淞予獨重夫四海四瀆之水兮何
源遠而流長浮天地而浴日月兮泄尾閭而濫觴吾乘
長風而破巨浪兮蓋有似乎遊聖門而望洋其他疊嶂
層峰千流萬派或崇或卑或小或大國志所書禹貢所
載莫得其詳姑述其槩此天下一統之山河也天潢衍
派玉葉流芳錫圭儋爵建國封王則秦晉周楚齊魯韓

唐遼岷代肅慶谷安湘潭伊瀋郢附以靖江載之祖訓
休矣烈光繇繇奕奕代有哲王惟我興國聖啓龍翔鄭
衛吳越蜀趙荆襄淮郛益德榮吉滕莊徽崇秀許汝壽
岐黃朝輝雍浙衡涇及梁曰裕曰景其來未央王子王
孫兮益蕃益昌郡邑分封兮甲第輝煌彼將軍兮中尉
又遞世兮延長是皆一本百榦萬蕊千枝原衍澤流靈
鍾慶滋彌布九有不數螽斯當與天地相為終始日月
並其光輝比天下一統之藩封也藩封之外遠不可悉

自粵門以南胡門以北東盡東海西踰西域則有天方

日本琉球朝鮮占城真臘亦力于閩渤泥撒馬交趾細

蘭大秦大食西洋西天一弗敵兮勿斯里三佛齊兮蘇

吉丹更有沙華國兮古麻刺弼琶囉兮忽魯謨榜葛刺

兮兀良哈吉慈尼兮默德那木蘭皮兮滿刺加默加臘

兮茶弼沙瑣里磔里藍無里新羅暹羅弼斯羅蘇祿蘇

門兮哈烈哈密勿拔層拔兮爪哇阿哇麻逸麻嘉兮打

網打板三苗三嶼兮百轉百花獺鬻獬突厥烏桓匈

奴鮮卑契丹先零肅慎火篩回紇吐蕃限以三衛控以
九邊畏威懷德強殞弱降梯航重譯玉帛來王此天下
一統之外夷也國之大事莫先於祀惟祖宗兮在天先
報本之誠意內奉先兮有殿外太廟兮有制盈室崇深
昭穆次叙禘嘗烝萬古不替赫上帝兮皇祇判高厚
兮覆載每歲孟春郊社並舉酌圜丘方澤之儀為上棟
下壇之禮父天母地兮同尊祖功宗德兮同配天子穆
穆臣工濟濟薦以玉帛泛以醴齊從祀則日月星辰風

雲雷雨社稷山川嶽鎮瀆海聖帝明王神祇太歲旗纛
先農城隍月將五祀十廟至於川嶽英靈陰陽神鬼藩
國賢王累朝英主道統真儒理學賢士名臣名宦忠臣
孝子循吏高人文士烈女等而上之則自生民以來未
有盛於孔子此天下一統之祀典也萃渙之道既明輔
理之司攸定百司庶府設官分政大小相承體統不紊
故公侯兮爵崇駙伯兮榮並公孤寅亮宗人衍慶五府
兵權六部政柄法司慎刑太學儲俊詹事輔儲科道諫

諍太常之祭祀必嚴通政之出納惟允尚寶符臺翰林
史筆光祿宴饗太僕馬政中書筆翰錦衣親軍行人皇
華鴻臚朝聘內監嚴密京兆承宣上林蕃育兵馬巡警
欽天授時太醫調劑進士題黃甲之名賓客匡青宮之
正殿閣閣門清光日近兩京攸同表裏輝映外則藩臬
十三郡縣千百都司運司儒學武學留守襲封陰陽醫
術軍民府分指揮司遞運所分水馬驛至於衛所等局
監苑場司閘壩倉庫關井宮祠王府職制土官羈縻此

天下一統之官制也若夫天語聖言載道論德縹帙牙
籤手謄梓刻緯地經天汗牛盈室乃木天禁地之儲寶
壽邦永命之脈書黜異端用備鑑擇茲不登書恐誤後
學至如資世通訓祖訓條章聖政之紀述大誥之昭揚
文集浩瀚律令精詳日厯纂玉堂之祕寶訓發金匱之
藏禮制頒行於司府集禮詔及於遐邦解論語之蘊奧
正書傳之舛訛孝慈錄分仁至義盡昭鑑錄分遠慮長
謨思親有詩教民有榜方竹有記白馬有歌雄文大製

誠與典謨相表裏協雅頌之中和此天下一統之詩書
也物產既蕃貢賦斯定秋分有糧夏分有稅萬困貯儲
千艘轉運採山之利既溥煮海之功尤盛市廛有征鹽
冶有額閑廩畜牧水陸釣弋機杼所成蠶桑所出庫藏
所儲坑塲所入國用所需民生所急此天下一統之貢
賦也上行下效謂之風衆心安定謂之俗六經同誦兮
六軍同令五教同敷兮五刑同治車同軌而書同文屋
同式而衣同製家同塾而黨同庠國同學而術同序文

章同體兮行移同式丁力同役兮土田同稅作息同樂
兮語言同音節令同厯兮日用同器朝覲貢舉兮同期
賞罰封拜兮同制揖讓拜跪兮同儀冠婚喪祭兮同禮
僧道巫祀尼媪兮同禁水火金木土穀兮同利律度量
衡符璽券契兮同於立信金石絲竹匏土革木兮同於
宣滯慶弔餞迎兮同於寓情宴饗餽贈兮同於將意所
以國無異政家不殊風閨無廢職野無惰農此天下一
統之風俗也都邑之宏侈宮禁之森嚴經陰緯陽象地

法天垂萬世之統緒表四海之觀瞻控海連淮江南佳
麗鬱鍾阜兮龍蟠雄石城兮虎踞浩長江兮天塹靄上
林兮春霄是南京為萬方之都會左環滄海右擁太行
南襟河濟北枕居庸瓊島春雲兮薊門煙樹太液晴波
兮玉泉垂虹是京師為萬世之家邦至於阻淮帶江連
河引泗鍾離漢名塗山禹會國家興王實鍾王氣如周
岐豳類漢豐沛是謂中都根本攸繫若夫洞諸門兮禁
城歸萬雉兮神京金門玉陛山河拱抱龍門鳳閣霄漢

光明更有景運隆宗月華日精六宮嚴謹七所紆紫親
蠶有館兮縹絲有室緝熙有殿兮觀心有亭外則百官
庶府棊布而星列千門萬戶霧湧而雲蒸此天下一統
之基業也夫人之見聞有限物理無極故肩背不可以
反顧鬚髮不可以縷析况天下一統其大如此豈常人
所能淺近而窺測哉姑述其萬一而已真人曰然構宮
室者必資公輸之巧定律呂者必賴師曠之聰故舜有
五人而致治武有十亂而成功今天下所以成一統之

盛者雖曰真主挺生歷數在躬然所以左右而輔翼者
必有一代之英雄不虛生曰誠哉是言夫子不見夫天
降時雨山川出雲又不見夫朝陽生矣高岡鳳鳴所以
國家將興賢才彙征理則然也況我聖祖天錫勇智不
階寸土龍飛淮泗英雄萬國不期而會當是時股肱心
膂於其間者豈可以數計哉則有若中山武寧岐陽武
靜開平忠武寧河武順東甌襄武黔寧昭靖堂堂六王
功全德盛餘則胡越盛名吳江智力趙梁氣勇俞驍材

識武襄食都督副之效勞蔡公忠壯東海之戰歿黔國
巢國兩全忠赤郢國靖海並著勲績高陽耿公死節不
屈皆能佐一人以成功配六王而廟食其他攻城掠地
撫順摧強出奇宣力徇義死忠五爵分封廟祀有光澤
流子孫與國同休武功如是此天下一統之所由定也
又有若犁眉公之譚謀帷幄龍門子之文章金石開司
寇之經綸詹承旨之材識曾侍郎之儀禮劉秋卿之定
律蹇蹇六臣名垂竹帛至於尊居四輔貴擢三公丞相

秉鈞侯伯分封開黃扉兮參知政事輔青宮兮贊善大
夫兵寢刑措禮備樂和居民敷典執法分符其他戚里
姻聯藩封輔導或任都邑或掌學校夷邦奉使丘園高
蹈報國死忠事親全孝存歿光榮古今輝耀文德如是
此天下一統之所由治也夫武以戢禍亂文以綏太平
一代治功相須以成良由我聖祖剛健中正寬大英明
配以聖后端一靜貞儲君有象賢之器羣屑皆屏翰之
英堯仁天覆舜德地承巍巍不與蕩蕩無名所可見者


惟功業文章卓乎煥然之可稱觀其得國遠過於唐宋
行師名正於湯武申明五常世皆復古建官革宰相之
專列爵罷子男之數去神祇之濫封改先師之像塑祭
先王以御名待亡國以賓禮家法正而兵令嚴寺人安
而戚里妥至如訂先王之禮樂復前代之衣冠正韻書
之偏音除封禪之異端紀年號而不改寘符讖而不譚
無徽名尊號之稱頌無離宮別院之遊觀德政不陳於
大臣公侯不封以文職親軍不隸於王府藩王不伍於

百辟舊章不亂於聰明恤典不分於存歿兵不出於無
名姓不冒於繆錫避諱止於不偏陳言許以直入威重
典於豪強隆師道於勲戚是豈無自而然哉蓋其體道
謙冲立心恭默於昭不顯之天建用惟皇之極法文王
之卑服遵大禹之菲食本原之地純乎天德所以功高
萬古德冠百王非三代以後之君所能及也太宗奮興
燕邸為京洪熙宣德仁薰義蒸於穆睿皇丕顯重明正
統天順乾覆坤承今我皇上握赤符王火德承乾運撫

璿極臯夔左輔稷契右弼都兪吁咈贊襄密勿總萬幾
以圖治登羣賢而效職孝隆至養允惟三后之尊儲建
元良茂衍萬年之厯但見分野加詳郡縣加闢山河加
壯藩封加益外夷加化官制加立祀典加崇貢賦加溢
風俗加美基業加飾比成化萬億斯年之初生斯世者
何以報照臨之帝力真人乃凜然而驚肅然而起北面
望闕稽首再拜而言曰嗚呼盛哉先生之言博矣大矣
至矣盡矣筆而成書可以為史垂之後世可以觀累朝

之盛治矣

御定歷代賦彙卷三十五



總校官庶吉士臣張能照
校對官編修臣楊壽楠
謄錄監生臣莫漢

欽定四庫全書薈要

集部

御定歷代賦彙卷三十六

欽定四庫全書薈要卷一萬七千二百五十五

集部

御定歷代賦彙卷三十六

都邑

北京賦

明 陳敬宗



聖皇之建北京也紹高帝之鴻業啓龍潛之舊邦廓

天地以宏規順陰陽而向方準四裔以布維揭八表而

提綱燦星分於箕宿映黃道之開張壯天險於居庸亘

重關於太行會百川於遼海環河岳於封疆拱北辰兮

帝居陋輦固於金湯均萬國分會同而適居天下之中
央也於是頒綸音建皇極布深恩施廣澤捐內帑之金
錢出天府之玉帛賚工垂錫匠石歡聲傳衆奔走萬國
雷動雲興紛紜絡繹忻忻踴躍各供厥職遂選材而度
物資百神以興集魁奇挺拔千仞之名材五色五采布
世之珍特輦載旁午舟運充斥紛河輸而海會肆丘蘊
而山積爾乃太史告吉司空奉策魯班運斤公輸削墨
智者獻謀勇者宣力精論巧思悉就經畫百堵皆作奮

擊鼙鼓之弗勝庶民子來咸頌靈臺之勿亟歸壯麗於

崇朝睹崔嵬於瞬息前朝後市之規既肅肅而嚴嚴左

廟右社之制復亭亭而翼翼布列有序不爽寸尺妙合

化工莫究窺測其正殿則奉天華蓋謹身之尊嚴翊以

文樓武樓左闕右闕之增屹開千門兮萬戶帶巖廊以

迴紫臺百尺以截巢重三階以躋登屹中天以層構抗

浮雲而上征激日景以納光耀丹碧於紫清觀其瓊階

瑤砌赤墀彤庭青瑣金鋪綺窓朱櫺鏤檻文琨玉碣繡

楹跼丹鳳於阿閣棲金爵於觚稜懸綵虹於修梁躍蒼
龍於飛甍含靈曜以欲翔望北辰而高興飾華棟以璧
璫綴琁簷兮列星彤霞映榮楮之葩萼薰香鬱椒壁之
芳馨日華麗文拱之玲瓏空彩鏤罽毼之晶熒三光臨
耀五色璀璨壯麗穹窿莫罄名贊憑鴻濛以特起凌太
虛之汗漫爰業乎雲霞之表巍我乎層漢之半邁天關
以益崇炳祥光而增煥目眩轉於仰瞻神惝恍於流盼
雖使都盧之巧捷不敢以躋攀翔鷁之扶搖不可以鼓

翰此誠所謂曠千古之希逢超萬代之奇觀者也其前
則九門洞開輦路如弦軒軒豁豁坦坦平平望園丘兮
宮堯接靈壇兮山川昭神貺兮景彰揚瑞彩兮雲煙啓
大明兮當中翼長安兮東西森拱衛之嚴密列周廬之
逶迤耀雪霜於戈矛揚鷹隼於旌旗選鷗冠之桓桓精
百萬兮熊羆維方叔兮召虎蘊謀略兮神奇聯金貂與
玉蟬紛爲奕而光輝雜冠珮兮趨蹌蔚百司兮威儀各
攄忠兮獻納亦覃慮而論思天官之明衡鑑司徒之謹

度支宗伯之修禮樂司馬之整六師秋官之邦刑是慎
司空之百工惟時羣僚濟濟各謹攸司大小率職庶績
咸熙其後則有太液之池萬歲之山琪樹敷榮金芝芳
妍翼鳳飛兮絕巘波龍鱗兮澄瀾聳靈峯於天上流惠
澤於人間其右則乾清坤寧之宮太一紫微之所壯皇
居於九重肅勾陳兮天府若夫蓬萊方丈之神區閭苑
瀛洲之仙宇臣實昧於見聞不可得而殫數其左則為
文華之殿鶴禁青宮玉葉金枝儲副是崇講道育德惟

孝與忠體文王之三朝謹視膳之禮容又其左則有石渠天祿之閣金馬玉堂之署濟濟逢掖戔戔章甫講說六經之言談論羣書之語斟酌禮樂之文涵泳仁義之府莫不欲笙鏞乎治道黼黻乎皇度至若靈囿之所蓄亦雜沓而紛綸麒麟之振振騶虞之彬彬白象之瑩潔如雪金猊之威猛如神顯靈姿於龍馬逞奇文於福鹿絢綵霞於丹鳳胚玄兔於蒼玉鸚鵡之色維黃素烏之質耀霜紛珍異之炳煥咸獻瑞而呈祥他若內藏寶貨

之充金玉珠貝之富象犀虎豹之雄驊騮騏驎之庶國
家富有萬國茲固瑣瑣不足數也其外則都城列兮萬
雉開十二兮通衢蔚邦畿兮千里比百萬兮民居接棟
連甍溢郭填郭霭霭鬱鬱密而不疎邑里錯分別井分
區四民樂業室家歡娛農務乎耕桑士究乎詩書維工
及賈貿遷有無百寶之所充斥百器之所崇積燦金珠
兮列肆聯繒綺兮阡陌珊瑚琳琅璀璨赫奕飛畫棟兮
綵甍藹王侯兮第宅填車馬於闐闐紛雜沓而絡繹喧

舞榭與歌樓樂鐘鼓兮昕夕載瞻辟雍學宮逶迤穆穆
乎宣聖之廟肅肅乎羣賢之祠崇祀有典釋奠有儀歌
棧樸以作人偉髦士之攸宜贊朝廷之禮樂炳道德之
光輝於是經營既終厥功告成方青陽兮屆辰逢吉日
於元正於時萬象維新三光以明麗慶雲於璇霄燭祥
光於太清皇上服袞衣乘鑾輅設警蹕陳鹵簿翠華歲
蕤颺雲飄霧潔精誠寡思慮奏雅樂諧韶濩謁郊廟告
太祖香苾芬其上升靈昭昭兮來下眷盱繄兮方集綏

萬福兮純嘏於是升金根旋太常御正殿開明堂朝百
官臨萬方會諸侯陳玉帛旌淑慝明黜陟然後布德和
令行慶施惠錫高年兮上尊進賢達於庶位敦唐虞之
道德厚湯武之仁義興三代之禮樂黜漢唐之功利炳
玉燭調元氣協重明於日月侔化工於天地使九州八
荒含齒戴角之羣四方萬國懷仁負義之士莫不熙熙
皞皞於太和仁壽之域仰事俯育於漸摩涵煦之內此
誠所謂恢鴻業於千古開太平於萬世際輿圖而覆載

大一統而無外也是知國家萬萬年隆盛之慶皇上萬
萬年高厚之壽聖子神孫萬萬年無窮之祚蓋與天地
同為悠久也

北京賦

明 李時勉

惟皇明之受天命也我太祖皇帝首仗義師以平暴亂
豪傑景從聲振江漢削除僭竊拯民塗炭定鼎金陵撫
綏萬邦乃睠茲土實雄朔方倣成周之卜洛欲並建而
未遑逮我聖上繼明重光握乾御極一遵舊章仁聖洋

溢乎遐邇恩澤汪濊於八荒既致治於太平遵皇衢以
省方仰先志之未遂度弘規以作京兆經營之伊始徧
中夏其歡騰曰惟北都在冀之域右挾太行左據碣石
背疊險兮重關面平原兮廣澤宗恒嶽其巍巍鎮平閭
而奕奕冠九州之形勝實為天府之國是以軒轅邑之
以分州唐堯階之以為帝擴神化以宜民大勲德之光
被鬱王氣之所鍾於今茲而有待也於是仰瞻析木俯
測地靈龜筮兆吉天人叶應神祇獻珍而山石自出河

嶽效靈而神木自行民子來兮相續期不日而功成爾
乃懸水樹臬識景表營方位既正高下既平羣力畢舉
百工並興建不拔之丕址拓萬雉之金城引天泉於西
阜環湯池而鏡清九衢百廛之通達連薨邃宇之縱橫
顧壯麗其若此非燕逸而娛情蓋所以強幹而弱枝居
重以御輕展皇儀而朝諸侯遵先軌而布仁政者也若
乃四郊砥平皇道正直視萬國之環拱適居中而建極
其南則萬流宗海平林蔽天攬邯鄲鉅鹿之廣衍馳平

疇沃野之繇延溘淤恒衛徑其野濡磁涑梁匯其前界
以大陸廣阿之宏壤院以大茂井陘之連山包絡趙魏
襟帶齊魯膏腴之地繇亘三千餘里而極於黃河伊潁
之川其水陸之所產卓犖繁盛蓋莫得而計焉其北則
疊嶂疊危層巒蔽虧長城矗乎雲表百泉湧乎山隈壯
天關而設險守一夫而莫開偉左盤而右顧宛鳳舞而
龍飛實磅礴而鬱積粵擁衛於邦畿包狼山上谷之險
據野狐獨石之危掩祖山木葉之離立連白登紫塞之

逶迤控女真而極乎洮河之北鎮朔漠而逾乎瀚海之

渚控弦之類射雕之羣畏威懷德相率而來歸其東則

潞河通漕控引江淮肥如灤涑灌注縈迴連峯片石之

隘首陽崆峒之厓玉田白壁神仙瓊臺超無終而越金

山跨遼瀋而逾鴨綠至於暘谷日出之涯固已遐哉邈

乎而莫不在乎綏懷環以大海衆水所歸洪濤巨浪洶

湧崔巍蓋不知其幾千萬里而蠻商番舶帆檣隱天上

下不絕而往來又有蓬瀛方壺鳳鱗聚窟十洲三島靈

異非一珎精之闕瓊華之室墉城宮堯金臺萃律紫氣
丹青景雲矚日靈圖倕仝安期羨門之倫相與遊從乎
其間出入隱見而怵惚瞻帝京其伊邇庶可見其驂鸞
駕鶴之髣髴其西則崇山鬱翠高挹泰岱北接居庸南
首河內奇峯擁闕龍門阻隘玉泉垂虹青煙浮黛上巍
巢兮倚空下蟠據而際海其麓則有渾河湯湯西湖泱
泱鹽溝琉璃桑乾廣陽雪波泛湧灝漾汪洋一瀉千里
會流帝鄉又有上林禁苑種植畜牧連郊踰畿緣丘彌

谷澤渚川匯若太湖瀛海渺瀰而相屬其中則有奇花
珍果嘉樹甘木禽獸魚鼈豐殖繁育颺颺藉藉不可得
而盡錄固可以因農隙而校田獵選車徒以講武事乃
遵國風稽王制詔期門簡將帥乘玉輅擁翠蓋出天闕
而雷轟轆芳郊而雲會非所以威戎誇敵娛樂稱意蓋
將取不孕而除菑害狩無擇而順殺氣謹大易之用於
三驅之時驗駒虞之仁於一發之際水衡虞人之容與
武夫壯士之奮厲皆知夫仁者之為勇而以投石超距

之足鄙亦何必殄夷禽獸割鮮野食而以俯仰極樂之為貴也若夫宮室之制則損益乎黃帝合宮之宜式遵乎太祖貽謀之良居高以臨下背陰而面陽奉天凌霄以磊砢謹身鎮極而崢嶸華蓋穹崇以造天儼特處乎中央上倣象夫天體之圓下效法於坤德之方兩觀對峙以嶽立五門高矗乎昊蒼飛閣岿以奠乎四表瓊樓巍以立於兩旁廟社並列左右相當東崇文華重國家之大本西翊武英嚴齋居而存誠彤庭玉砌壁檻華廊

飛簷下啄叢極高驤闢闔闔而蕩蕩儼帝居於將將玉
戶燦華星之炯晃璇題納明月而輝煌寶珠焜耀於天
闕金龍夭矯於虹梁藻井煥發綺窓玲瓏建瓴聯絡複
道迴衝軼霄漢以上出俯日月而盪胃五色炫映金碧
晶熒浮輝揚耀霞彩雲紅其後則奉先之殿仁壽之宮
乾清坤寧眇麗穹窿掖庭椒房閨闈闕通其前則郊建
園丘合祭天地山川壇壝恭肅明祀至於五軍庶府之
司六卿百僚之位嚴署宇之齊設比館舍而並置列大

明之東西割文武而制異至於京尹赤縣之治所王侯
貴戚之邸第辟雍成均育賢之地守羽林而掌飲飛者
至九十而有四衛莫不并列而綦布各雄壯而偉麗其
巖廊之上則有皋夔稷契之倫元凱俊乂之輩相與賡
虞廷之歌談義農之際罄補衮之能懷忠貞之志考禮
文於大備贊聲樂之盡美是以朝無缺政德教漸暨薄
海內外均陶至治幸其有作聿來趨事成此大功忘其
劬勩人和既極休徵滋至慶雲瑞靄之覆於闕庭素烏

玄兔之獻於丹陛醴泉屢出甘露數墜麒麟騶虞之珍
馴獅天馬之類紛紜雜遝莫能殫記於以見天眷之益
隆而聖德之純備者也於是正月上日工既訖功爰告
成於天地肆紹美於祖宗清心凝慮齋沐肅雍采盛既
潔牲牲既豐芬郁郁以旁達靈續續其來降錫嘉貺之
穰穰介景福於帝躬將順應於昌期趾盛美於無窮乃
服袞冕御帝座開九重之深宮受萬邦之朝賀內侯甸
而要荒外殊方而異俗胥近悅而遠來紛鼓舞而匍匐

方物溢以充庭麥絢燦而駭矚率蹈舞於階墀效華封
之三祝爾乃浹和會昭景鑠鏗鯨鐘奏雅樂詔光祿以
開筵合百辟而燕樂饌珍玉兮芳馨壘瓊漿以斟酌聯
韶蟬兮夾陛雜蠻夷之荒服莫不酣暢而飽德咸頌歌
而踴躍越填城而溢郭藹歡聲於寥廓斯可以媲美太古
之無為慶華胥而蹈栗陸顧皇上之謙抑視至治為未
足於是降德音播嘉惠省刑罰薄歛稅汰冗濁旌廉吏
舉賢才擢俊乂發倉廩賑貧匱尊高年而禮有德慎防

禦而修武備貴爵重賞以厲廉恥厚往薄來以馭夷裔
蓋欲使人知所本士知所勵四方萬國無一民之失所
窮陬僻壤無一物之不遂舉陶於春風和煦之中而樂
於雍熙泰和之治此蓋堯舜兢業之心文王敬止之意
所以紹鴻業繼先志益宏遠而有偉故不勞而甚易冠
絕乎前古垂休於後世固可必聖子之與神孫益昌盛
而無替小臣微陋忝職文字願賦帝都之盛概揚國美
於萬禩復為之歌曰煌煌帝都兮逾鎬豐阻山帶河兮

壯以雄天開日月兮王氣所鍾穹窿造天兮惟帝之宮
廓氛祲兮開溟濛鎮夷夏兮宣皇風王道平平兮四方
來同願皇圖之鞏固歷萬世兮無窮

北京賦

明
盛時泰

巍巍燕都冀州之紘分在尾箕析木之精入燕朝以建
土輦丕迹於玄軸星默運以持衡皇潛祈而兆域紫微
韜約以含輝太一翕雪而拱率故望氣者跼蹐輸悃命
卜者屏營掩祝蓋嘗覽夫形勝總環瀛之要害抗萬垓

而建瓚在高辛之末世已昉號乎幽陵及下迨於軒轅
戰蚩尤而底平虞夏商湯易稱朔方武封堯後以薊為
疆召公起燕藩屏用昌自秦漢而郡縣歷晉唐之雲擾
洎金元之游更寔恭待乎宏造邈惟南征鞠旅而踐既
正厥稱邦畿允莫定理條疆分途異縣配南都肇北京
納儒臣之懇請設行部之新名易順天之崇號應大興
之符稱於是不蹟闕開前後角犄樹疆表哀連環並峙
左右起伏矗幄連起建學校新宮園文武錯列輜分輻

輶規肖矩倣視南益詳街衢巷術宮宇橋梁闌閭市廛
翼接鱗翔塚廟庭宇古今萃藏將以獻歲躬受方賀肆
赦蠲罪蘇姦釋過忻兩都之並錯措天下於一家商邑
翼而靡頌周京顯而匪誇沛遐惠於四埏遂都民之樂
康給農器於遠路用樹植乎農桑載男耕而女織混樂
土之相望忻漕運之廣濟儲邊嶠之積糧貴竹貢而置
輔交趾悚其內降伊絃歌而管誦抑濟濟而蹌蹌遂因
官而論次偉羣績之恢張海宇顛其再輯黎庶被以重

光覃疏流於外國咸矯首以來王大巖山呼騶虞麒麟
野蠶作繭玄兔來馴嘉禾屢穗海宇和平黎庶鞠育忻
然如春於是却封禪之請謝金火之丹毀方祕之謫賜
兔書之緘集儒臣纂經史詮六經之要道覈千古之精
理罷滄溟之轉運藩郊圻之牧圉因時屢登大敞鰲山
宴輔弼以既醉沛醑澤之弘寬製新曲以示藻又大惠
乎錫函及乎午日乃游東苑觀逮作場視射成讌車騎
集鞬橐韜萬柳偃旌旗高賦聲詩以紀歡永昭示於表

縹念烽火之未靖久為患乎邊城時跳梁而躑躅敢窺
覬以橫行憫生民之被禍將大肆乎遠征嚴威迅發萬
輿遙啓大漠荒陲開營疊壘迅刺擊之猛利乃奏凱歌
擁衆以旋塵凝警謐威聲四埏北斗南瞻清泉神應繼
統垂緒端拱垂裳致海宇之寧謐降渥惠於四方自乾
清御皇極建九旂臨萬國雞人未唱擊鼓定時銅符初
闢魚鱗扃匙宿衛紛其未散羽衣聳以來齊南象導路
代馬引遠豹尾在後森列徘徊玉節止肅寶纛示威黃

旄絳旛旋繞相隨班劍儼其冰雪儀刀凜其鉞鉦羽葆
團以婉轉金城耀以菁蔥團扇紛其掩映曲繖屈以從
容龍戟列而如迅熊旗繞而縱橫大駕將陟武備後列
丹陛之駕馬步之輦玉輅大輅于于馬簇簇馬雲蒸而
霧繞者不可仰覲於是司隸稱警鳴以條狼凜內外之
井然人持冰而沃湯鴻臚傳唱萬方畢集宗伯捧函嵩
呼海溢覺天地之高厚忻日月之朗光見蟬貂之濟簇
擁環珮之鏗鏘既伏拜而舞蹈又頡頏而翔翔聳蹕蹕

而怵惕見萬疊之翕張垣墉峻峙匝匝凌兢輦翔穹赫
奕煜峻嶒聳金被錦圖丹見青色煜煜而成紫又雪灼
以為黃或燥煢以為赤抑燿燿以成光肆呆愚之四繞
羌絕晶之煒煌階盤旋而自轉橋矗抗而迴杭廟婉逶
而散陟戶鴻洞以崇祥石瑩明而若琢甃平直其似霜
堊烜赫其勝霰粉皙白其若瑤棟隆聳其上仰梁嵯峨
其橫當紛海藻以為飾盤龍珠以吐光豈倭般之人巧
殆雷電之天丁屯紫螭於刻桷盤赤螭於雕楹虹揚鬚

以指棟鵬矯翼而飛。愛綺葩吐乎邃井，淫彩爛於疎櫺。絳霞影於網戶，金爵棲於觚稜。儼軼翔而下啄，疑軒揭而將騰。爾其華蓋承宇，亘中直連。謹身後接，邃密艷演。午門端門承天大門層列，疊拱竅竊崢嶸。順掖之啓，左右峻嶒。東西華角並帶，同橫立瓊樓於兩傍。分文武而各馳，錯諸彩以掩映。築峻牆以為基，列御道以中敞。分左右以為墀，列直廬於其外。見栢欄之對起，躡玉橋之長虹。湛瓊楹於金水，接萬拱之突兀。騰重簷而複宇，東

有文華扈以文淵西有武英截臬騰騫太廟齋宮對聯
社稷廟街社街繩平砥直隆宗景運月華日精椒房椒
風六宮安貞貢庸蒿柱黼帳藻局疊複道於雲表比鱗
瓦而建璫訝晨輝之閃雪映旭日以上昇於是祝萬壽
祈帝福永羣方澤四國錫罔陵同覆育紛拜舞躬踏肅
繪振羽衣靡褱襖踉蹌顚同忻大造矚虎豹之欄檻
檻見駝犀之胷脚驚麋鹿之餐苹駭鹿兔之狂躍仰昧
眇而俯興望翠華之拱翼雜輝煌以奔趨隨玎玲而緩

曳棟玉笋之嵯峨仰石獅之凜慄陟銅山以跋踰渺金
河之滔疾天子方且肅朝覲之儀明賞罰之典大黜陟
之公重祖宗之憲嚴邊防置京儲督漕運謹市虞罷遊
讌御講筵日淵默之燕居豈輕輪之暫旋凡諸可遊矚
以備一時之旋駐者莫不扃金鑰以鐫封合魚符而不
啓恣草木之叢茂任禽鳥之沐徙岵岵凹凸巔巔齷齪
樛葛蔚薈苔封蔓絡複蹬洞巖豁開磊落達道委而暫
閑駟馬停而不駕玉螭峙以拱護金鰲萃以孤騫堆雲

凝而不流積翠高以生寒瓊華冒其間寂承光艷以回
環廣寒虛其輪囷飛鯨戟以羽翰雖玉泉之縈抱亦流
水之空潺蒲葦兼葭菱藕雕胡鱗游介泳任其自如於
是散步環籞觀於列署則隨長安之左右列文武之職
廬表裏森其對峙咸拱繞而扶疎擁前後而聳列環玉
河之通渠見左右之並置亦遠近之聯裾仰以法乎周
典俯以效乎商模列六卿於左省建五軍於右隅院以
玉堂為署寺以奉常為胥醫藥星厯大僕鴻臚縣隨府

而遠控衛與學而各殊內鈴各衛外總諸營繞貔貅之
精銳簡戈鋌之旗旌置給舍於廊廡帶太學於墮闕闢
九門之通衢週里坊之四十峙萬雉於千層莽縱橫而
曲直前列其奇後峙以偶左右並聯各互為耦鎮以重
樓壓以飛甍疊甃壘以曲檻互欄楯以相通跂蹠婉轉
睥睨蔽空廬舍巡演濠潢深崇閘洞備其卒急魚鑰司
以晨鐘抱關察其馳駟衙衙貫其四衝乃有九衢往涉
輿馬肆雄沙堤平以曲折昏曉湧其成叢市肆星羅恣

人耽翫橋梁濟顛萬邦酬券冰蠶作繭雲鼠成絲火浣
為布蛟龍織鬚番絨蜀錦烏連越締海陸俱興草蓀或
奇伎藝精工戎裘各宜灑汗則帷幕生飈摩肩則海濤
成塹呵氣則鬚柱消冰轉目則睨光迅電誠鋪集之盛
區乃閭閻之美玩廓廓新築用衛閭閻乃環旋以拱護
益永壯乎神京立七門以便出增崔嵬以峴岵路雙甃
以敞遂勢陟峻以峻嶒設壘礮以作衛儼電擊而雷轟
前恢日衍後奠彌阡豈漫作之是玩實貽世以康寧蓋

嘗總而論之通畿甸遠京輔內都邑外荒服雖古昔之
攸同維茲地之獨武近則倚昌平以為脊敞范陽以為
胃連山海以為帶擁上谷以為屏惟玉河之澄澈貫周
迴以為經若諸水之蓄洩視高下以流洑百泉湧派而
穴漩孔洞玄垂於深谷遠則據嶽鎮之中軸勾東西之
勢雄西以華山為虎東以秦岱為龍南嶽南鎮益遠益
隆五嶺作案於嶺表江河襟帶而朝宗展明堂於輿海
拱朝拜於羣峯以此而較往昔傳堪與之比崇自鴻濛

之初闢奠河山以為界天勢崇於北極地維虛於南蓋引日星以上騰導江河而下派法天明以居高控地維而作帶故南北之相望誠控馭之雄蓋昔姬周之豐鎬每侈詠於詩書豐距鎬而一水又何有於雄圖况嬴秦與劉漢奚敢論乎訐謨若嗣此之鼎建咸分集於一隅雖迭興於前世誠遠讓乎雄紆故散如布棊聚如運掌分列省以成疆合連襟而成鎡如堂視地類脰走項誠高厚之拮据乃金湯之修攘方輿如此是以足尚若夫

土風則稟樸茂之淳資賦勁勇之正性豪傑挺生勲庸
克靖朗烈悲歌沉鷺鎮靜文雅寬舒傲宕平定至於民
俗尤為繁富財貨充溢四方罕覩以穠獷為輕肥耽輜
橐為雄武出則輜帷高塞遊則金翠如堵人幕面而障
塵士垂綃而避土或睚眦以報仇抑椎埋而作旅通名
姓於禁中任榮枯於吹詠惟僭侈之是營豈禮法之可
阻司察避其昏酣乘驄難其羣伍晨闐難於廣陌暮躍
馬於深聚蹴踘則千里為羣鳴鏑則飛走成府詎貴璫

於要津亦近戚與雄族任俠者履不容旋鼓篋者車不
停軸忻冠蓋之繽紛總邸舍之填簇節序則時當寅令
賀正為始彩燕為簪春盤成俎祠太一禁火炬春序將
遡墓祭成侶逢午散騎置巧陳瓜騁望郊垌乞巧天娃
因陽九而登高為冬朔而設炭忻長至之屆臨喜陽生
於一線迎臘祀竈驅儼設宴看冰池於署官欲蕃育乎
鷺鴈雖舊俗之可傳亦真贗之難辨棄衣糜以送窮燎
草竹以成薦本度朔以畫桃因除虛而設奠若日忌與

月惡亦隨方而異宜總四時之令氣合四方之所奇風
霾則塵沙迷暝霖雨則阡陌成泥雪落則皴瘃裂掌冰
結則柱矗如旗以臺榭為登陟用苑囿為陂池因衙衙
為環繞庸沙渚為藩籬雜坊市而共處隨冠笄而相嬉
五陵讓其豪俠四姓失其光儀地土山數厥類實繁擾
重甲於四方菓蔬疏其援植虎刺班於楹棹蘋婆甘於
來禽朱櫻素柰香水黑岑桃李梅杏安榴丹椹黃牙赤
根石菌天花蕪菁碧蓮雲臺茄瓜薑芥蘆服水蘇韭芽

欺江南之萑菜邁南國之鮭蝦列於一市山獬海獺原
貂隰楚姑略不言用戒登俎唯有人才世所軒軼三代
而後七雄為烈二京三國扶綱抗節左羊而後代有其
傑樂毅以寸書報燕荆卿以匕首泣血田光以刎劉實
交蔡澤以片言取捷河間以被服擬儒中山以聞樂選
德神佛方伎殆難指陳至於古蹟惜多湮淪遺故都於
軒轅指孤竹之令聞悲廢宮於碣石想寧臺於荒荆雖
巨公之學所亦榛莽而沈淪獨王鬱之釣臺猶稱名於

花村雖有深谷伊誰生黍雖有甫田伊誰種玉徒紅螺
之吐光空青蛇之應祝變幻無常雜沓難述故自薄海
內外綱條目定較如畫一整肅嚴翼天旋地靜垂萬斯
年金甌罔競勝周營洛邁漢作京視唐已拓較宋實宏
建帝王之全業成創守之令聲合天維之四時盡地埏
之八瀛蓋萬世而永寧也

北京賦

明黃佐

粵若稽古帝軒都涿高陽幽陵宅繇北廓堯之為君始

於唐而建國周封其後亦於薊而列爵帝德丕隆莫尚
於燕明庭萬靈之所朝光被四表之所先夏后治水則
夾右碣石召伯分陝則錫山土田所謂王不得則不王
而秦漢乃棄置於窮邊契丹則南京始建而中都大都
遂代興於金元天將俾於有德於是文皇肇建為行在
應大興之顯符光黃唐於遐代北平易名以順天旋坤
軸以正乾蓋此實天府之國乃混一之大都會其地博
大以夾塏亘若繩直而砥平倚重險而壓函夏屹若坐

堂皇而眎廣庭盪幽并之氛霧揭日月於太清義端門
以普照合宇宙而大明惟帝降祥匪人弗成假手於至
元而豫兆於明矣蓋淪胥五百歲天運剝極而後復析
木開津玄冥司軸望醫閭以為鎮宗恒山以為岳水環
繞以為隕山雄峙以為幅崑崙叢乎沙渚陂淀注乎旱
麓儻儻而牧者五擾之畜穰穰而穫者五種之穀朝宗
則河濟淮海守險則漁陽上谷儻基謀之不臧奚景命
之有僕聞築黃金之高臺思展賢才之驥足求文武以

戮力遂永綏乎天祿及至定京師建辰極也縣水樹臬
規玄矩黃晷緯冥合龜筮襲祥營繕釐其務司空提其
綱命離婁使布繩施隸首之算章枕居庸於紫塞環瀛
海於扶桑襟滹沱於清苑擁太行於雒棠廣九門以通
軌摹八區而辨方地不愛寶天降珍物神木自行山石
自出巧倖公輸剖剝綴絳猷俸捐金功成不日環重城
於天陔森飛觀之盤蔚長虹帶通壑以委蛇萬雉冠崇
墉而律趾輦道纒屬朝著彪分周廬拱衛列應星文長

安大遠冠蓋繽紛其下九塗簇集輶輶曳髮編氓鋪若
煙雲戎匠受役伎藝精勤角隅珥市鄧隧孔殷疎懷映
肆散帙典墳鼓篴固多彬彬文雅之士而感慨悲歌者
亦任俠而成羣於是邸舍填溢履不容旋紅塵冥冥幕
面頰肩姁倬女士輜帷高騫明眸玄鬋金翠翩翩當折
筭而易哿亦豔妝而逞妍貴璫要鉉子姓童隸僭侈自
雄司察反避衣狐白而策乘黃樓姬姜而棄憔悴昏酣
睚眦以執讐旦暮椎埋而弗忌京游之士實繁有徒通

籍禁閭噓榮吸枯賂之則升天階忤之則淪淵壚豺狼
晝伏於當道而唯訶彼稷鼠與城狐至於翱翔四郊走
田飛弋鬪雞蹴踘罔事貨殖儵掣金以訾價俄躍馬而
鳴鐃誅皇路於天衢是以姦慝發而亡迹蓋圻甸提封
會歸攸止險其走集守其要鄙兼夏商之職貢奄秦漢
之文軌梯航纍乎九譯廢置通乎萬里其陰則天壽磐
固長城崔嵬古北喜峯蘭峪黃崖重關疊嶂之槩天守
以一夫而莫開彈琴鳴乎其峽黃花鎮乎其隈大翻越

乎湯峪媯川流於懷來野狐獨石之巖嵒龍沙瀚海之
潔洄攬蒙狄於開平通龍虎之璜臺北征於時而振旅
霓旌參簇乎斗魁酌葡萄之玉液旃裘伏而獻醅其陽
則三橋萬柳玉河通惠潮白桑乾百泉所會緯以涑易
磁濡經以淤塘漳衛掖以大陸封龍揆以井陘無棣襟
黃河而帶伊潁絡齊魯而苞趙魏登披雲以延佇見天
津之遐滙東吳輸乎杭稻叢雲颿以如薺鱗介泳於川
渚萑葦紛乎旆旆海陸產乎珍美雖林閭莫能以淵計

東郊則有潞河之灣通漕之流控引江淮運集糧艘萬
國冠裳以發以休玉田黍谷蒙嶧之果跨遼瀋而踰鴨
綠山川菴藹而相樛嗟燕昭之妄謬迎羽人於丹丘汎
延芳於灕陰得契丹之莽洲鷺鷥散而海青翥尚餘回
極之浮浮西郊則有玉泉垂虹西山積雪西海激波流
入皇闕盧師二龍蜚遯潭穴平坡翠微五華屏列潭分
玉淵蕭爽皎澈崆峒石經之天矯大房孔水之融結越
鹽溝與劉李乃縱志而舒節過督亢之荒陂悲丹軻之

計拙返薊丘而眺廣陽躡齊政而蔭禪樾渺西湖之蒲
荷絕龍舟之纜檠水天混而光流涵沙禽於鏡月爾乃
朝陽近郊將臺威陀偃武云久講藝投戈崇文覲路曲
接海涯率茲潞渚至於白河直沽湍瀉灌溉靡多開鑿
成隄大有麥禾穰穰歲獲富我天家正陽之南苑圓闔
拓三海汪洋四序弗涸按鷹有臺飛放攸泊狐兔嘖嘖
麋鹿濯濯浮飲衝波宛潭淮汭其淵則有文蛤水馬朱
鼈金龜絕綸巨鯉衝苦奔鯢鰓鰓繁於涿光鱗鱗詭於

靈蟠其坪則有雲木煙蘿森森裊裊隄柳汀蘆縣黎火
棗梧疎鳳條槐舒龍爪森至紛披與波浩漾其渟皋則
有鴈鸕鷀有鳬鴛鴦水宿萬羽叢沍迴翔其叢伊何葭
茨蒼蒼靡蕪茅菅藁本莎香射干陵苔堯韭禹糧芙蕖
菁莪兔絲鹿腸其奧壙則多松檟榛栝楓楊楸槩籊輅
梗梓梅杏棠棣六駁四照日曠雲蒂雨馘風胎並育庶
類猿鶴蜚征經息百態上有捕雀垂鳶之錦翹下有嚇
虎綴毬之刺蝟初疑趨撲之可及倏已騰躍於無際區

彌祝粟界軼咳弓丹翠茝藪仰不見空映流溢望瀛滢
成饌暢不漏景陰不翳風密孕元氣昭鋪化工鳴噪互
而域別谷籟荅而響同虞官待狩玉鑾間入扈以羽林
騎而袴褶長圍漸合羽毛畢集鉞鉅來而轡忘歸輿韎
鞞而欽決拾鞬適脫而戾穹昊條甫解而竅遐隰於是
旃門張華旌揚疑笳鳴疊鼓襲迴颺颺起焞烺發矢命
中巧於更羸冒結而震網搖撞杌而坤軸昂颺颺匿爪
而迅攫獐獐掀斷以交鏘其獲如雨割鮮舉觴羣工霑

醉分擘賜盼蓋講武事於農隙而匪遊豫於太康爾乃

西循宣武越彼金岑草場蕃育舒鴈翰音野塘鳬藻唼
呬浮沉至於阜成苑開上林翳蔚愛對蔬果成陰崇桃
萼實乃玉乃金花紅青翠香水黑琴朱櫻素柰若榴丹
椹虎刺斑於楹棹蘋婆楸於來禽英絡其間蟬秒相引
亦有嘉蔬綺蔥豐本黃芽赤根天花石菌蕪菁芸臺葵
茄薑薑菜服頽於夏萼水蘇脆於冬笋逆蘇循崖玄厲
赤脂青蒙白堊金星畫眉貞岷類玉可礪可碑宛平瀛

壤陶為琉璃光瑩鑑人結甃成曦雖拳石與撮土亦鍾
淑而瓌奇遵西直而北指經得勝與安定憩東直而迴
眄歸瑜珈之海印集毛羣於幽都以谷量其孳孕陋彼
周宣之考牧匪直牲牷之肥腴至乎御馬之苑惟二十
區日閑輿衛歲產龍駒肇昔八駿以靖難迄今七驥之
翰如乃有榜葛麻林麒麟並車周郊石固迭獻駒虞福
鹿文逾於吉皇玄虎豪勝於黔菟馬哈雙角垂腰而類
獬駝雞玄翎玉翮而異餘凡致諸福之物有王會之所

未圖而歲革月化莽為數區尚存馬政之流弊民瘼奚
繇而告蘇然而始設京輔之屯分自留衛之半起富民
以充殷實於以均貧而杜亂於是弛真定廣平醵薄之
田賦與河北滄濱之鹽稅而不算時築雲代之墩臺歲
防河間之水患於萬斯年既隆內治而謹外扞矣馭世
長策豈非超黃邁唐為百王冠者哉其宮室也闢丹地
之焜煌開天闔以高驤垂若華之景曜儼望舒以相頡
颃萬疊燭欵舒趨螭旋鱗萃屹若崇岡抗浮雲而上

征亘玉繩以齊光正殿則奉天尊嚴陵霄填極華蓋承
宇居中儼持謹身聯後益邃以伋縣邈豐彤繆羅坂減
重陸雲簾花礎盤礪四面軒洙下甃瑤城瑣牕藻井間
金繪飾上規園以穹窿下矩折而繩直楹繞金龍以甄
甍檐騰神鳳之翬革繽紛九采之璀璨晝晝采愚之絡
繹其前則奉天之門常朝是衙橫聆倜儻岳岳戔戔飛
宇建霓旂拱蒸霞陰蚪負橈陽馬承阿中奠黃屋鏤以
金華結臺開軒含景敷葩八維象乎紫極四表達於絳

河遏緒風於間隙流旭日之靈和閭披四目陸納九齒
明翼等威玉筍攸止鬼瓊樓而立兩傍文武分而鼓鐘
峙出掖門之東西棕蓬延而對起曰思善與景運於左
右而迤邐雲闕翔五鳳於璇霄玉橋亘三虹於金水直
廬宿衛容裔於前而斜廡轟轟乎其相睥午門之內殿
閣嶙峋東有文華蒼龍守闔上憲攝提析木之津先聖
先師祠禮惟寅啓嵯山之碧鏤蹕竊丘之廣輪扈以文
淵東觀與鄰史館聯開雕牖相因冊府甲觀圖書萃珍

西有武英金虎環陛象彼甬觴衡石積層虹梁鯨棟巍
巢迢遞端居存神修令發制牙璋葆旂焱動靈厲百爾
幾務罔有停滯左入太廟迨廟街門四孟時享對越駿
奔東建齋宮高廣端正簡樸無華適萃誠敬宮垣之外
東苑是營坦途豪傑遞接南城濬洳嬰堞靚深窺宵夾
路嘉植攢峯開沼林霏幽垓石瀨迴繚天然縣圃中有
壺嶠時端陽聳翠華翔建駕棚集龍驤擊綵毬射垂楊
帝子王孫金玉交相薄言觀者股肱之良勁捷驩燕藻

詠柏梁永樂之世角藝惟常亭臺經始宣朝雅制天順
復辟式廓以麗龍德之殿拱振正中崇仁廣智左右相
雄彤墀瑤砌壁檻綺櫳其門則丹鳳在南蒼龍在東殿
後秀巖翠黛騰空環屹運之團殿聳縹緲之奇峯巖亭
旁踣凌雲御風玉梁在前追琢璽瓏夾以天光雲影表
以戴鰲飛虹永明佳麗窈窕相通環碧在陰淙淙溶溶
錦鱗文禽喁喁嚙嚙淨芳瑞光門閣穹窿跨以翔鳳梯
霄頰藻別有閒館嘉樂昭融出入東華是謂南宮凡其

金鋪朱戶莫不掩映乎芳叢聖皇大孝世廟觀德易乾
德以重華列鴻慶與崇質仁以欽天孝以追先二閭並
樹巍乎煥然浮丹麗紫納雲冠月負宸萃誠達於天闕
協鴻名於大舜終以崇先而昭揭右社街門入祭社稷
為民祈報如幾如式又有西苑越在子城入自西安出
則乾寧萬歲之山秀拔崢嶸太液之池環抱泓渟雖名
由元立天肇明禎然徙宋艮岳延引玉泉則金狄之所
經營其遵甕城而陟丹梯也攀承光之金殿躡飛鯨之

石梁踰數百武則鐵絳丹檻浮游蘭漿達瓊華島登廣
寒殿而超方羊邇而睇之玉棟金鰲堆雲積翠坊表金
碧照映松檜遠而望之崧岱並立大河橫帶俯視江淮
一目無際恍若凌倒景而躡鵬翎入鈞天而聞鳳吹飄
飄霞舉豈非快哉梳妝高臺已化蔓草而仁智列楹蹊
山半者亦幾經興廢矣介福延和厥門尚存而昭行殿
建自先朝者實為大觀東有凝和陸離馭駢浦淑煙絲
龍舟鳳舸西有迎翠遙挹山光林幽鳥悅岑蔚翔翔東

北太素草繕堊飾質任自然如植圭壁九島池北涵碧
亭亭丹檻翠牖隱映淵澂緣厓徂東樂成觀櫓雲碓風
輪千以舂杵承光南許崇智在茲金蓋玉檻旋匝循磯
芭蕉園南灌水歲歲日照和者越紅亭闢黃扉而見水
田農舍乃知小人之依從南臺達西隄過射苑轉芳蹊
入兔園小山之門而躋焉洞泉九曲金龍注池松蘿陰
陰居然青谿出園東北瞰池倚壁暨後左門亦置翼室
各有平臺迢遙靖密武廟於斯閱騎射而吾皇恒以延

輔弼軒曰遠趣館曰保和亭則歲寒飛香與擁翠映暉
會景與澄波飾為錦芳亭前有沼啓閉通池花卉圍繞
翠芬出於竹陰寶月藏乎樹杪玩芳距凝素以芬蓋臨
漪偈美金而潑晶皇營新殿清馥是名芝楣繡拱虹植
電衡耀碧霄以紺間垂毓華之光晶牡丹紅藥之屬普
受和氣而嘉生至於園有丹桂綠椒渚有芷蒲蘅杜而
溪驚天鷺諸棲泊者又莫知其數鬣獅異獸石臺銅柱
牧放其間匪直斑龍與皜兔周文靈囿於焉再睹蓋自

玄武門外出北上中山勢蜿蜒而未窮其下周迴百果
龍蔓出其委翳回眇天池翠島真蓬萊之在九重也乃
立保泰格於元極殿聯無逸所重民食亭揭豳風耕藉
黍稷倉曰恒裕扉曰寶穡壇祭穀祇五福時錫復有蠶
氏之館採桑之臺以備親蠶繰織剪裁修飾仁壽之宮
踏六鼇而造三台嘉禾連穎甕繭成筐則奉慈闈而進
仙杯綬幕靄靈鳳車徘徊而神御望清之閣頽清虛而
洞開於以見皇心仁孝慝元真而洽滄厓乃若後宮則

有奉先之殿次以奉慈禘則太先永言孝思配帝明堂
睿宗惟宜夙御景神寶善慎獨休明昭融迎祥安福玉
祀金扉祇祇肅肅清寧之宮棕殿以朝後園炫映樹玉
池瑤乾清坤寧兩儀成象純殷寶勢闔闢相向房闥內
布綵疏外陳六宮旁列爰處妃嬪東則延祺鍾粹毓德
西則啓祥隆禧景仁複道迴衝以聯絡掖庭阿那以采
循百子符螽斯之蟄蟄千嬰應麟趾之振振碧瓦鱗差
朱門雲艷欽安中黃表儀四極雕欒鏤案蕙樓椒壁霖

彤殷乎朱櫺芳馨流乎翠幃明珠燭玄夜以為晝列錢
耀白簡而成色居瑤光之壺與御瓊珍之象席銅龍
節其興居銀鑰嚴防於昕夕日精承千祥之滋至月華
炯百福以翼翼東宮左達鶴禁逶隨西內作對燕居惟
時黜儵麗嫺安樂且綏撤大善而燬佛骨崇聖學以恒
緝熙堂有精一執中弗違室有恭默匪道弗思齋有九
五天德是祇亭有敬一御箴永貽乃宸皇史以寶芳策
今可述而古可稽皇城東南高宮宏啓長孫所居軒墀

戢晉東安巽隅十王有邸差次儷陳皇皇韡韡前星重
輝天潢分汜萬桷鸞浮千栢鳳起迨夫光祿大官六科
黃門尚寶之司亦邇東安黃衣有徒灑埽供事儀文璽
綬以及櫪駟監局之號二十有四銀璫珥貂時維閭寺
出入絳闕捧擁琬輿導我綸綍敬慎不渝於時天顏正
王道復顯巍巍徽穆穆昭景鑠絕芽慾龍威玄端齋明
盛服貫魚有序六尚分局永巷愔愔皎若承旭出納精
微無遠弗燭乃若九門中恢京城之前孔道馮隆其直

如弦文皇肇祀合地於天爰集靈壇接以山川制倣留
都獻歲揭虔壇分四郊吾皇攸建乾父坤母南北裸獻
兄日姊月東赫西烜二至二分受釐錫羨祈穀舞雩亦
罔不徧昭明寅畏用德克堪卿雲呈絢滴露飛甘六幕
清宴百嘉寧覃窮靈極祉有圖牒所靡談者矣是以白
環碧砮之貢日旅彤庭之琛星聚河清之歌歲登樂府
之詠讎侏之從王化猶洪聲之收清響雕題之樂神州
若游形之招惠景會同之館惟見其來烏蠻之譯不聞

其曠攜旌倪而為家日嬉遨乎市井觀治化之元同徵
邊陲之無驚爾乃設官分職宅俊陟明長安左右三事
九卿文武分闡曹司坐扃玉河東西詹案翰瀛太醫列
院欽天步星太僕設寺考牧於京鴻臚行人各守典刑
督府參以奉常法司聯乎貫城五軍之外三千奇兵益
以神機為三大營簡其精銳則立團營十二丕振乎天
聲然猶偃戈鋌修俎豆而樂育胄監之英是以宣后儲
神矢詩於穆清北望崇文之閣而思天下化成承天之

門具瞻攸聚月朔京尹率見宣諭黃圖璫錯正厥稅賦
太倉儲粟積滯紅蠹督以司徒出納俵護北控九邊是
致是附垢玩綦於正德四家盤乎百度鎮卒不留屯而
折色是需鹽商不詣邊而轉運民部墩臺日傾什伍暴
露唵咎內侵皇赫斯怒尚賴乾符助順坤珍助富邊郎
萬鏹賚徧於長城工程百爾惇大而成裕苟徒苦節駕
言守素則是絕文字而結繩棄冕紼而冠布也爾乃練
時日選車徒萬乘出七萃驅犍恩揭殿陵祀之居行宮

開闢沙河之塗思先靈之陟降越昌平以北盱精裡畢
戒射夫弋欽鴟殪封狐羆氓磨至梟獍畢屠銀山鐵壁
陽翠軍都星奔電擊冀馬燕弧田獲庖充爰賜大酺乃
幸九龍之池籞時聞萬歲於寥廓太烹陳鞮轡作天酒
醺皇情樂薄暮言旋軍麾動乎朔漠皇不自聖周爰咨
謀勲戚鼎輔召邇前旒足食足兵幃幄運籌內帑充乎
十庫外庾貯於通州鈇櫨芻粟飛輓若流築外羅郭紆
南牧憂魂魄金塏枚枚雉闔包括崇文竣於宣武黔首

樂依光我成祖建旄干以標望不可仰而可俯雖使都
盧之巧捷不敢以投足翔鷄之扶搖不得以運羽由此
論之策天功以臻成必有非常之元不惜小費乃罔後
艱是故襟帶周則保禦易楨榦固則搖拔難淵源深則
濶派浹盤根大則奕葉繁盍觀諸天乎上提三光下輪
厚坤連珠合璧日發歛而不憚其煩乃能榮百昌於萬
古鋪元氣於人寰

北京賦

明
余光

夫燕之為都也疊以太行五華之障函以軍都湯峪之
屏表以岱嶧之杲之鎮箚以盤龍密雲之增帶以白露
渾源之川鞏以漳衛直沽之津扼居庸以制勝若乘高
而建瓴擁燕雲以馭夏若坐堂而俯庭狹關中於西阻
陋中原於四馳界齊魯之東藩並吳越於南陲固華腴
之上土天地之弘畿廣六合以為宅極八表而橫披封
畿四環開地千里略其遠形即其近鄙則西壠為壁不
下函崤滄海為潢罔論長河銀山崇墉北壓紅羅巨馬

連淀南迫滹沱數搏爽以中廣歸雄拔於周遭龍翔鳳
舞以自天玉帶銀山而盤我層巒擁翠重岡飛丹埭業
虎眇巔屹狻蹲左銘右鐔排楯列干則有翠峯紫蓋白
浮黃花之山蜿蜒蝮曲鸞舉蛟騰懸崖迴赤峭壁流清
前昂後軒九折百磴則有分水八盤摘星九莊之嶺卧
龍有岡彈琴有峽巖棲呂公崖壑菩薩石經有洞孔水
時發桃花有峪延朗挂甲峒旋白雲谷迷石髮則是山
間之幻奇幽明之吐握者也浩浩蕩蕩瀰渺無外瀆瀆

淳淳躍龍擁怪歌霧蒸雲鰐雄吞介掀島奔雷洶湧傾
沛則有滄冥之海濕餘浸溢琉璃回波桑乾逸駛易水
紫沙九濟入沽玉帶洶之則有百會之河百泉成溪玉
淵成潭金盞為淀直沽流曇飛放泊淺駱駝港涵車渠
之橫亢陂之湛則是衆水之蓄別瑞氣之瑩含者也海
有神鼇巨螭鼉蜃樓蚌珠擁劒八帶甲魴青鰩巨靈
駕而往來海若鼓而馳驅奇鱗蜿蜒而變龍舍利甌甌
而化車長鯨負山而若漚修鯢吞航而罔濡又有鷄鵠

鷓鴣環薄於扶桑鵠鷄駕鵞浮蕩於渤澥大鵬巨鯢扶
搖於雲衢輕鷗修鵲漂沒於澎湃青骹奮隼以鷹揚白
羽紛驚而沉介何風舉雲搖之匪常而儼忽莫窮其幻
怪山有昆駮獠猢巨挺犴狃狻猊猓猓蜚蜚巨虛文豹
隱霧於崖谷白虎嘯風而負隅萬萬操管於幽峪射干
跳伏而避無又有猿狖騰捷於林莽飛鼯垂鳶而捕雀
遊鵠跋跋於盤磴鷹鷂奮翅而莫搏異鳥回翔而擇木
猛獸陸梁以趨壑易貌分形牢落翬散而驚傳河則洲

浮鴻鴈鵠鴟歸鳧之鳥渚戲魴鯪鱮鯿之魚汀萋
萋而蘭芷洎蓬葦而葦蒲野則樅栝梭梓紫榆白楊檀
梗楓槭赤柏甘棠楸枰夢葑蔚乎千章其離離者則有
真定之梨信都之棗固安之栗清流之稻蓁實胡桃花
紅蘋婆海東青翠朱實垂柯其駢駢者則青驄獅子赤
汗玉駟驊騮褭驪駉駉奔紅騰黃擁甲鳴鑣其蔚
蔚者則石菌天花蔓荆葳莎菅蒹芴苕臺婆娑玉芻
懷羊苾芻彌皋其瑩瑩者則丹錫玄精赭磁水晶紫斑

礬綠玉沙鐵銀玄滋素液墨井鹽冰薊門石鼓援桴而
若擊玉田白壁誌柱而難名其間玉泉之流瀦為西湖
則芰荷十里隱映天光菱花當鏡芡實蓮房翠浪渺渺
錦纜牙檣芙蓉曲島杭稻凌塘室通鮫女宮浸梵王沙
禽水鳥之翔集遊鱗唼藻而徜徉宛都邑之瀛洲逼南
國之湖湘藪澤之匪別為南海則域獸有垣按鷹有臺
蔬果蕃蕪碧樹縈迴狐兔之所奔走麋鹿之所駢駘樓
煩彎弓而莫發俠客控騎而相猜兕麕驚而伏草鳬鷺

駭而絜漚湫上林於莫數蓋視雲夢為瓶罍八荒貢賦
四通而達其南則南金赤玉珠貝珊瑚駭雞火齊琳瑯
昆吾庶土百珍集於天都越羅吳錦三壤之租千艘萬
艫達於張灣之瀘其西則球琳琅玕熊羆織皮碑礫鏐
鐵璫魯耀瑜大宛名馬蒟醬蟾酥千輪萬轂屯於張掖
之郭其東則銀貂白狐之裘海豹玄獺之革果下青驄
朝鮮弧韞來於薊門之磧其北則羶裘皮革駿馬海青
韓盧駱駝獬貉黃鼬度於居庸之陁夫寶土者物寶物

者民寶民者國寶國者人故形勢強幹而匪本賦產外
腴而非真伊都邑之赫奕繇人物之駢臻故古稱幽并
多感慨豪俠之士有沉鷲文雅之名伯桃併糧而濟友
劉沉重道而薦朋則友生之風近諸古也網成却應而
相秦蒯徹用信而下齊則弘辯之雄冠於時也晚見而
速成者徐樂之說行也遮道而願留者寇恂之才厚也
蓋延圖形於雲臺盧植養晦於上谷佐漢於流離者賴
張飛之義勇輔晉於丕盈者繇張華之盡鞠盧玄雋首

於北海弘策制勝於建康則文學籌策之雄莫能方也
照鄰列名於四傑盧鴻擅芳於二盧則詞藻節槩之流
無以踰也崇文破蜀以興唐劉蕡正對而落第則武略
直言之磊磊者也趙普相宋以平夷遵晦鎮邊以服遠
則沉略弘度之卓卓者也呂端處大而不渝世傑臨危
而罔變則弘亮忠節之耿耿者也他如知古張儉之在
遼企先韓昉之仕金天麟天猷之佐元圖事揆策各盡
其能上觀於古下逮於今既強且勝既庶且殷勇者不

乏賢者如林強不在勢力不在黔得人以實重譯奉琛
奎璧旅乎箕尾王氣淳於析津自靖難於南邦復親幸
而北巡相厥土於天室用改營為紫宸距雄關以四固
時高臺以陞臨於是爰謀厥衆僉云其良卜諸龜著協
兆允臧既幽明之同孚乃籌度乎短長始自南而北伐
恢中宇之神州繼定都以控朔較殷遷而遠猷考厥制
之宏偉自文帝以規方商豐約以折中準南都以為量
載觀其外雉堞倚角葉葉巍巍徧觀其中里閭雜沓翼

翼輦輦通九門以轆轤魏萬第而依依營賓館於千坊
開廛市於九圍聚百貨於通閭商賈貿而紛緋闐闐設
以周旋質劑平而罔違散則衛營星布而閑以鈞陳統
則府部夾峙而附以蘭錡爾乃崇廣宇以九筵狀龍從
於不周架長虹於碧水若蒼壑之騰蚪立天柱以表日
曉閭闔以立杲端紫宮而崔嵬架瓊閣而雲浮築增城
以回截比金墉而相侔龍首齊而涌雷雲雀矯而跼蹐
俯太行而結構凌太虛以崢嶸內則文華罔下於玉堂

謹身實陋乎宣室昭和若邁於長年神仙不及於崇智
朱鳥匪耀於承光麒麟豈瑞於無逸奉先時勤乎駿奔
欽天儼臨乎上帝亶敬孝勤肅之煌煌匪傾宮瑤室之
為麗於後則閣道穹窿掖庭披璿瑩若朝霞之流盈髡
若玄雲之舒霓藥櫨疊旋而錦布壺術幽閨而若迷戶
萬門千永巷重閨倚窈窕而眇然撫珍樹而猗猗惟保
真於溫室乃西南其戶相若蕊宮之璀璨絡珠玉而火
齊圖雲物而變化畫仙靈而披離又其西則太液涵玉

波而蕩漾春雲繚瓊島而幻竒海屋渠渠而隱艦廣寒
擁碧而倒垂青馥芬芬而含翠寶月溶溶以獻卮錦芳
臨沚而湛綠玉螭跨石以飲渚雜芰荷以游泳渾魚鳥
之忘機天子雍穆與時咸和於茲清暑遂即素波飛彩
鷁以輕颺垂翟葆而婆娑建羽旗以搖曳恍溯洄於銀
河或齊棹女或縱櫂歌優游容與載咏載哦亶瀛洲之
蓬島奚羨月殿之遊遨乃聖王之偕物調玉燭而陶陶
又其池之北有萬歲之危峰凌霄漢而隱闕煙樹靄而

蒼濛又其峰之北有海子之汪洪望之若江鄉之渺渺
涵之乃樓閣之重重是又世外之佳境負塵宇於罔同
者也爾其大則築四郊以分祀通天地之神明重則建
九廟以追遠格祖考之精英勤則亭幽風以親藉躬勸
稼以叩解儉則開蘭宮以視練臨蠶館以勸嬪要則歲
皇史以宗錄鑑萬世以守盈斯皆修累朝之曠典補周
儀而復增破迂儒之沉惑正舛廢於再清乃躬修玄默
夙夜跼蹐戒虎賁以清道驅徒卒以除闕乃召宗伯酌

儀損益乃諭太常修樂祝冊乃命御史省牲視帛以嚴
褻數乃命即將列屯布營以森戈戟至日乘玉輦駕蒼
龍冠通天以崔嵬服玄袞而穆雍執蒼璧對蒼穹奏鈞
天擊圓鐘終九成而協律舞八佾而翩幢儼天帝之歆
隆臨瓊臺而冲冲柴既燔而神格乃回鑾於紫宮慶大
禮之有成謙羣僚而融融伊方澤之將事儀少變而齊
同既祀四郊乃崇六典當陽春之載熙覩百卉之蔓衍
名農官以備耒戒田夫以修畎思無逸之攸重爰命駕

以乘輦值馮相之下吉靈威首於芟剪呼攝提以先驅
奔豐隆為後殿介士鳴鉦而建鉞虎旅冠鷄而執戣導
被繡之髯髦駙蒲梢而張幟萬騎雲擁而分布千師交
戈而橫揃於是登龍輅植雲旗紆皇組佩玉螭青屋列
於原野朱旌揚於郊疇田畯歡騰而介馭農正進耜而
三推始天田之芒芒忽禾黍以離離酌勤惰而勸錫感
萬姓而吁嘻咸山呼以鼓舞乃擊缶而力耜歌豳風以
環駕亶追邁於皇義觀萬民之樂業與輔臣而賡歌分

春醴以共飲元老霑而若醑鐸耳之傑髻首之豪舉和
鞞韞之韻而謳鞞昧以陶陶相與娛於化日騁蹻舞以
相高於是皇輿返轡駐於西苑喜蠶事之方殷命后妃
而釋珣且從事於桑室伺三眠而罔宴天妃先效而親
繅諸嬪肅肅而獻繭慕姬姜之儉修脫昭陽之婉孌斯
德化於掖庭而禮繼於丕顯爾乃染盛親舊祭服親織
誠已洽於神明胡饗祀而莫即神人協和軌度罔忒舉
於九重刑於萬國一時聿新千載作則既月乃吉辟雍

實臨釋菜先師黌宮實升徹聖像以破謬崇正學以還
淳進司成以論道何會裂而統真環經生以拱德信帝
王之學與韋布而罔倫既乃靜修天室時幸文革開經
筵以進講列學士而搜遐探真腴於簡逸測淵海於津
涯延輔臣以諮問若憲老而罔加爾其九重拱乎堯舜
八座列乎皋夔禮行而民革樂備而物怡仁風拂而遐
荒溢化日長而幽谷曦天子方崇文默不事武奇誠以
憲祖歡以偕時與民睢睢與物熙熙遊畋射獵之好不

騁吞刀吐火之伎罔施沙棠木蘭之舟弗製魚龍角觝
之戲奚施於是黃河清甘露凝白兔皎皎白雀來庭白
鹿呦呦百瑞是絳德洽兩儀瑞應千禎聖王罔以為寶
而加志於持盈春秋代而彌隆遐邇渥而益蒸既齋賜
乎農扈乃勞賞乎車從薄五申平三令麾騎士而進弓
聊樹表而小畋授征鼓而控驄示以陣形節以軍容牙
旗分布於鳥雲勢分鸞鶴而乘風蒲且滿殼而不發樓
煩挾天而窺狝上將披駿而仰視脩鳴鏑而墜雙鴻遂

命解果弛罟撤隊回騎效三驅以成禮不翦羽以窮奇
慕太一之三面懷萬物以化齊且歸來乎履吉迓滋至
之天休為無為而德湛與黃軒以優游是故仁無不懷
德無不柔文教與玄風而並翔至化與大造而默遊太
階平於八表玉宇涵乎九州亶登三而咸五孰云遐遠
而莫可以匹儔况九廟郊陵之建匪若阿房之事遊觀
謁陵恭祀之巡匪若上林之縱射獵盖王者之典咸備
惟聖人異世而合轍將使煥乎其有章而陋百代於罔


軼彼蟋蟀之云何抑齷齪於儉嗇由是觀之則地勝者
居皇聖國實者多賢良無東西與中都而並較猶未若
茲土之無量然則宜奕世之神肩咸作京而坐朝堂者
也

御定歷代賦彙卷三十六

謹案第十三頁前八行輞分輻輳刊本輞訛輞據
說文改

第四十四頁後三行奏鈞天刊本奏訛奉今改





總校官庶吉士臣張能照
校對官編修臣楊壽楠
謄錄監生臣吳鏞